

KUYA KWANDE A MAFULO

 Halu yemeňi ona cwalo fa nako nyana.

Mulimu yomunde, lu itumela ku Wena ka kolo yeňwi ye hape ya kuyema mwa ndu ya Mulimu ni kulapela Mulimu yapila. Lu itumela hahulu kuli lu sa filwe litohonolo mwa naha ye. Mi cwale lu itumezi hahulu ka sicaba se si sepahala se, hape, Mulena, ba batile limaili zeňata, mianda anda ya limaili, buňata bwa bona. Mi babaňwi ba bona baka lika ku—ku fita mwahala silami sa mbundu ha banze ba kuta, busihu boo, batile mwa makululu a linzila, kusila linzila za makululu. Mulimu, Ni lapela kuli Ube ni bona ni ku ba tusa. Ba zamaise, Oho Ndate. Lu itumela ku Wena ka pula nyana yefafalize ye lu batiselize moyo, fa nako nyana.

² Mi, Ndate, lu lapela kuli U kopane ni luna busihu bwa kacenu mwa Linzwi la Hao. Kakuli, kona libaka le lu putehanezi, Mulena, ki ku kopana ni Wena mwa Linzwi. Lutuse, Mulena, kuli ku kopana kwa luna kube ni tuso yetuna hahulu kwa Mubuso wa Hao, ni kuli lu tusehe hahulu, kuli lukone kutusa babaňwi. Alaba lika ze lwa kupa, ka Libizo la Jesu. Amen.

Mwakona kuina.

³ Neni nani fela lipuzo ni likalabo nyana mwahali mwani. Mi mane mukopano usika kalisa kale, Billy anifa si—si sindunduli tuna sa zona kufitela Ni—Ni palelwa kuziba hande fa ku kalela. Kono lu lapela kuli—kuli Mulimu ami fuyaule ka kuikataza kwa mina ni kuina ku libelela sebelezo ya manzibwana.

⁴ Cwale, Mulimu ha lata, Sunda yetaha kakusasana Ni kaba ni—ni sebelezo hape. Ne ni ambola fela ni bo mulisana, mi ku likani ku bona.

⁵ Mi cwale Ni lakaza kuli kambe Neni kaba ni nako ya kulemuha mulikani yomunde kaufela yo Nina ni mwahali mo, kono Ni ziba kuli lwa libelela. Ku cisize. Mi Ni—Ni ka tuhela fela nako yeo, ni—ni kubulela fela cwana kuli, “Mulimu ami fuyaule.”

⁶ Mwa ziba, Hakuna nto yetuna yeňwi yeniziba yeo mutu akona kuni kupela, kwanda kubulela kuli, “Mulimu aku fuyaule.” Mwabona? Haiba Uka eza cwalo, kipeto kona fela ze Ni tokwa, ona—ona seo fela. Ni sepa kuli leo kona linzwi lelituna hahulu mwa—mwa mishobo, “Mulimu aku fuyaule.” Mi, cwale, mi Ni ziba kuli Wa fuyolanga.

⁷ Mi sina ha Ne ni bulelezi musala ka mizuzu nyana yefitile. Ne ni—Ne ni lika kutapa, mi ne Ni si ka oma kale. Neni—Neni oma, mi kipeto Na koloba hape. Na oma hape, mi ne Ni palelwa kutina hembe yaka, mane. Mi kwa shutana nyana mwa Tucson. Ku cisa habeli mo kuciseza kwanu, kono cwale muka—

muka ina kusina kufufulelwa. Hakuna niheba—hakuna niheba kubatelwa mwa mbyumbiyulu, konakuli ku bata hahulu mu sa zwela fande fela. Ha mu toma pani ya mezi fani, kipeto kufelile. Hamukoni kufufulelwa, kakuli li ka mi hamula fela zeo kaufela kuzwa ku mina musika ba kale—musika—musika fufulelwa kale. Mwa fufulelwa, luli kaniti, kono hamukoni ku u bona. Kacwalo, kwanu, Neni nani nako yetata fa kuba ya omile. Kacwalo, mi Ni—Ni sweli na koloba ona fa.

⁸ Neni inzi mwa muzuzu kwa mulaho mwani, mi ne luna ni batu ba sebene kamba ba eiti mwahali mwani, ba litaba za bona ze ne tokwa kutalimiwa ka putako, mi zani ne lina ni kutalimiwa ona fani kapili.

⁹ Cwale, libaka le Ni nani kuinela cwale, ni ku mi kupa kuli mu—mu tahe, kakuli Ni—Ni ikutwa kuli ki—ki tuso yetuna ku luna. Hani—Hani koni kueza cwalo, balikani. Ni—Ni nahana hahulu zeñata ka mina, kuli ni eze cwalo, kutaha fela ku—ku to teezea mutu, kamba ku utwa ze Ni na ni kubulela, kamba nto yeñwi. Hani—Hani koni kueza cwalo. Seo hasikoni kuba hande. Ne si sike sa bonisa lilato laka ku mina, ka kutaha fela ona cwalo. Mi ha Ni lumeli kuli mutezi ku . . . Niha, Ni ziba kuli mwa ni lata, sina ha Ni mi lata. Mi—mi kacwalo Na—Na—Na ziba cwalo, kusicwalo ne musike mwa eza lika ze mueza. Kacwalo Ni nahana hahulu zeñata ka mina, kuli mane Hanikoni neba ku mi inisa mwa kucisa ni lika zeñwi, sina cwana, haiba Ne ni sa hupuli kuli ki nto yekona ku mi tusa.

¹⁰ Konakuli, Ni sika taha kale kwanu, Na likanga luli mo ni konella, fapila Mulimu, kuli ni nope nto yeñwi yenyinyani, mwendi Liñolo leliñwi cwalo, ni kukupa tamaiso ya Hae, taba ya mafelelezo lu si ka zwa kale ki kuli. “Tusa, Mulena Mulimu, ka mukwa o muñwi, bafe—bafe kaufela Zeo ukona ona sicaba sesinde see.”

Mi Ni kulubela, ni kulumela, kuli Ni ka pila ni mina kamita. Ni sepa kuli ye kona nako ye kuswani hahulu yelu nani, halunze lu yema hamoho sina cwana. Lukaba hamoho mwa Kuyakuile. Mwabona? Ni eza cwalo. Na—Na—Na lumela cwalo.

Mi Ni bata ku mitusa. Mi Na, haiba Ni bulela nto ifi kaufela ka mafosisa, Ndate ya kwa Lihalimu wa ziba kuli ha ki Na ya tabelia kueza cwalo; fela ki kuli ha Ni liezangi ka kuziba; ni banga fela ya sa zibi.

¹¹ Kabakaleo, ka kuziba kuli mina mu sicaba se ni lukela ku tokomela, mi mwa mazoho aka, kwa Evangelii, Ni bata kuli kamita ni mi beye mwahala makepe a Bibele ye. Mi—mi Ni . . .

Linako zeñata batu ba ni tezi, ni kubulela kuli, “Muzwale Branham, kambe no ka taha fela kwanu uto bulela kuli ‘KISONA SA BULELA MULENA’ ku mwana ka yomunyinyani ya kula, na kaba hande. Zwela kwani mi ubulele fela kuli, ‘Uka ba hande.’ Kona fela ze Ni bata kuli ueze.”

¹² Cwale, sani ki sa likute mi sa lateha. Mo Ni itumela ka sani! Kono, mwa ziba, Hanikoni kueza cwalo konji Ha ni bulelela, pili. Mwabona? Na kona ku lapelela mwana, kueza kaufela ze Ni kona.

Kono, mwa bona, ku cwani hane Ni ka zwela kwani ni kubulela zeo ka maikuto fela a ciseho? Mwabona, hane Ni kali, “KISONA SA BULELA MULENA,” zani kaniti ne likaba fela zona za bulela maikuto a ciseho yaka. Mwabona? Mwabona? Mi kipeto za kona ku ezahala hakulata, kamba mwendi halikoni ku ezahala. Kono, he, ku cwani haiba mutu ya swana yani u mwatasi a maikuto a ciseho yaka, mi kupala ku ezahala? Konakuli, mutu yani ukona kuba mwa—mwa butata fokuñwi mwahala bupilo ni lifu, mi cwale sepo ya hae ikaba kai cwale? Na ka saba kuli Ni ka ba mwatasi a maikuto a ciseho hape. Mwabona?

Cwale, ha Ni bulela sika, Ni lukela kuba ya sepahala luli kuli si lukile, ka ze Ni ziba kaufela. Mi cwale Ha ka bulela kuna, Ni kona kubulela fela Sa ni bonisize. Kamba ki sesinde kamba si maswe, Nina ni ku si bulela. Mi fokuñwi ki—ki nto ye sa tabisi ku bulelela batu lika zeo. Kono, kanti, Ni tamehile ku bulelela sicaba ona—ona lika ze maswe ze ka ba tahela, sina mo Ni tamehezi ku ba bulelela lika zende ze ka ba tahela.

¹³ Mi, ku zeo kaufela, lu bata tato ya Mulena. Fokuñwi tato ya Mulena ya shutananga ni litakazo za luna. Kono, niteni, haiba lu bata tato ya Mulena, ki nto ye tabisa fela kuziba kuli bumaswe bu ka lu tahela, haiba ki yona tato ya Mulena. Kamba iba zende kamba ze maswe, ki tato ya Mulena ye lu bata kuli i ezahale. Mi Ni ziba kuli lu talimana ni yona ka mukwa o cwalo.

¹⁴ Cwale, Na—Na ziba mizwale kwanu babanga ni mizuzu ye mashumi amalalu hañata, mizuzu ye mashumi amabeli kuya ka mizuzu ye mashumi amalalu mwa kutazo ya la Sunda busihu. Mi Na—Na hani zibi kamba Na kona kueza cwalo kamba nee, kacwalo Ni—Ni ka eza fela zende ze Ni kona.

¹⁵ Cwale, Ni sepa kuli kuna ni sebelezo ya kolobezo kapili kasamulaho wa ye. Ni utwile kuli ba kolobelize sikwata tuna sa sicaba kakusasana cwana. Ka tundamo, kwa banga kolobezo yenze i ezahala kwanu, nako kaufela. Bakutazi, ba Methodist, ba Baptist, ba Presbyterian, ba church of God, ba Lutheran, kaufela seo bali sona, basweli ku tahanga ku to kolobezwa ka Libizo “la Mulena Jesu Kreste.”

Mi fapila Mulimu, ha Ni ka yo yema fa Mayemo a Katulo, Nina ni ku yo alaba ka zona. Mi haiba Ne ni ka takula mihupulo yaka, ka kuba ya lukile mwa lika kaufela za bupilo bwaka sina Hanili ya cwalo, Ni ka ba ya itukiselize Kuungelwa ona cwale fa, kakuli Ni ziba kuli ki Niti ya Evangel. Mwabona? Yeo ki Niti.

¹⁶ Hakuna Liñolo nihaiba lelikana mwa Bibele ko mutu ufi kaufela akile a kolobezwa ka nzila isili fela kono konji ka Libizo la Jesu Kreste. Yona tumo ya “Ndate, Mwana, ni Moya o

Kenile,” fela ki kuli . . . “Muye cwale, mulute macaba kaufela, mu ba kolobeze ka Libizo la Ndate, Mwana, Moya o Kenile.” Isiñi mwa . . . isiñi kupunda malumbatina ao ku ona; kono mu ba kolobeze ka *Libizo* la Ndate, Mwana, Moya o Kenile, ili yena “luli Mulena Jesu Kreste.”

¹⁷ Mutu kaufela mwa Bibebe na kolobelizwe ka Libizo la Jesu Kreste. Mi Bibebe ibulezi cwana, ili, “Kaufela ya ka zusa Linzwi lililiñwi kwa Teni, kamba ku ekeza linzwi kwa Teni, ka nzila kaufela, bumai ki bwa hae.” Kacwalo Ni nani zeñata ze Ni lukela ku saba, kwanda ku ekeza sika kamba kuzusa Sika mwa Mañolo.

Sa ni kenyanga mwa butata linako zeñata, kono Ni inelela ona fo. Ki yena silelezo ya ka. Si ni tiseza ku kauhana ni balikani babañta. Ba ni tobohile kabakala ona zeo. Kono ibile fela Ni ka ipulukela Mulikani yo fa, yena Mulena Jesu! Mi ki Yena Linzwi. Hakuna taba, kamba nzila ki ya masulungundu a cwani, itatafale nzila yateni, Yena utaha ka mukwa o swana. “Mi haiba ne ba bizize Muña ndu kuli ‘Baalezebubi,’ kana ba ka biza cwani bani ba ndu ya balutiwa ba Hae?”

¹⁸ Cwale Mulena abe ni mina kaufela ni ku mi fuyola mwa biki ye, mi amife zende zeo Ni kona ku lapelela kuli Mulimu amife, kona tapelo yaka.

Cwale luka bala mwa Linzwi lelinde.

¹⁹ Mi—mi cwale muhupule, hape, la Bulalu busihu . . . Kana kuna ni sebelezo ya mwahala biki ya litapelo kamba nto yeñwi? [Muzwale Neville uli, “La Bubeli, mukopano wa litapelo mwa malapa, la Mubulo ni la Bubeli busihu.”—Mu.] La Mubulo ni la Bubeli busihu ki mukopano wa litapelo za mwa malapa. Ni sepa kuli sicaba sa ziba.

²⁰ Muzwale Junior Jackson, kana uteni mwa muyaho nji? Ni . . . Muzwale Jackson, Hani . . . [Muzwale Neville uli, “Eeni, ki yo fa.”—Mu.] Uteni ki yo fa, Muzwale Jackson. Ku lukile. Ni—Ni . . . Muzwale Jackson yomuñwi fa, Ni . . .

Mi Muzwale Don Ruddell, kikuli uteni mwa muyaho busihu boo kana? Muzwale Don, ki yo fa.

Mane ni buñata bwa mizwale, Ni bona mizwale kwanu ye zwile kwa Arkansas, ni Louisiana, ni—ni libaka ze shutana mwahala naha.

²¹ Mi Nina ni babañwi, mizwale baba hulile mo busihu bwa kacenu, hape. Nina ni Muzwale Thomas Kidd ya inezi kwanu kwa silyo, ukaba wa myaha ye mashumi a eite fo mwa mazazi alikani. Mi mwendi ka myaha ye milalu kamba yemine kwa mulaho, na pazuzwi bakeñisa butata bwa sinya, mi na shwa kwa kansa. Madokota ne ba mu palezwi bali aishwele fela. Mi Ne ni bata kusinya mota yaka ya kale, fa ku mu lekulanga, kwani kwa Ohio. Mi Mulena Jesu a mu folisa hande mane ka buiketo luli. Mi fa, yena ni mulikana hae yomunyinyani, busihu bwa kacenu.

Mi buñata bwa mina mwa ba ziba; mwendi babañwi ha baba zibi. Kono ki yo muuna ni musali bene ba kutaza Evangeli Ni si ka pepwa kale. Munahane taba yeo, mi se Nili muuna muhulu. Mwabona? Cwale, mi ha Ni ba talimela, kono bona ba sa itiisa kuzwelapili, konakuli Na tiya.

Kaufela luna lwa ziba Muzwale Bill Dauch ya inezi mwa lilulu le.

²² Mi, oh, luitumezi hahulu ka limbuyoti za Mulimu kaufela zetuna! Mi lizwelepili kuba ni luna kufitela tolombita ya mafelelezo yani haita lila mi, mwa ziba, "Luka shimbwa hamoho, ku yo katanyeza Mulena mwa mbyumbyulu." Munahane fa taba yeo! Kutonda sicaba, haba sana ku mi bona ni kamuta, kono muba hamoho ni babañwi ba sikuwata.

"Mi baba pila mi ba siala kufitela Kutaha kwa Mulena habana kutibela, kamba ku paleliswa," linzwi ki kuli, "bao baba lobezi," isiñi baba shwile. Batili, Bakreste haba shwangi. Bona ba ipumulelanga fela hanyinyani, mwabona. Ku felile. Oh, mawi! "Mi tolombita ya Mulimu ika lila; mi baba shwezi ku Kreste baka zuha pili," ba iponahaza ku babañata. Mi ka nako iliñwi fela, mu ka yema ni kutalimela, mi, kihande, ki yani muzwale fale, mi kipeto muziba kuli hakuna kunga nako. Mwa mizuzu yelikani fela, "Luka cinciwa, mwa nako nyana, ka ku kobya kwa liito. Mi hamoho ni bona, baba tondahalile mwa lifasi, luka ngelwa ku katanyeza Mulena mwa mbyumbyulu."

²³ Mi, ka ku nahana, ku ze lu boni kaufela mwa Mañolo, ni liponahazo ze sina likañi za hola ye lupila ku yona, za kona ku ezahala neba sebelezo ye isika fela kale, munahane fela fa taba yeo, busihu boo.

Mi, ka sani, lu atumele Linzwi la Hae, hanze lu apula mwa Maheberu kauhanyo ya 13, mi luka bala kuzwa mwa timana ya 10 kuisa kuya 14. Mwa Maheberu 10 mi...kamba, kamba muni swalele. Maheberu 13:10 kuisa 14.

²⁴ Cwale, sina ha Ni bulezzi, luna, halu fa likute kwa ndembela ya luna, mane ili nto yende, Ni...Lwa yemanga kamita ha lufa likute. Mane ni likezahalo za luna zetuna, lwa—lwa yemanga ka likute cwalo, kamba ku lumelisa, ni zeñwi cwalo, kwa naha ya luna. Mi cwale ha ba liza kuli *Papazo ya Likalulo Zetalu*, lu yemanga ka kukuza.

²⁵ Mi kakuba masole ba Sikreste, halu yemeñi ka kukuza halunze lubala Linzwi la Mulimu. Muteeleze ka tokomelo kwa palo ya Linzwi. Libaka le Ni latela ku Li balela; manzwi aka akona ku palelwa, kono a Hae kutokwa. Kacwalo haiba Ni bala Linzwi la Hae, fela, mu ka fuyolwa. Timana ya 10 ya kauhanyo ya 13 mwa Maheberu.

Luna ni aletare ya luna, mi baba eza sebelezo mwa tabernakele habana tukelo ya kuca za yona.

Kakuli mibili ya lifolofolo zani, zeo mali a zona na tiswa mwa sibaka se si kenile ka muprisita yomutuna bakeñisa sibi, lina ni ku yo ciswa kwande a mafulo.

Kabakaleo Jesu ni yena, kuli a kenise sicaba ka mali a hae tota, u utwile butuku kwanda munyako wa munzi.

Hakuli cwalo lu zwele ku yena kwanda mafulo, lu nze lu lwezi ku shubulwa kwa hae.

Kakuli fa ha luna munzi o tiile, kono lu bata o ka taha.

²⁶ Mulena Mulimu, Yana ni buikalabelo fa Linzwi le, mane ni musebezi wa ku Li tokomela kutaha mwahala masika cwalo, kubona kuli Li taha ku luna li si ka zwakiwa. Ki le li petehile, ki Linzwi la tite la Mulimu. Lwa Li lata hakalo mwa lipilu za luna ka nako ye. Lobaka palo ye, Mulena, kuli ibe tuto ku luna, busihu bwa kacenu; kuli luna, bana ba batu, lukone kuutwisia pizo ya Mulimu. Kakuli lwa likupa ka Libizo la Jesu. Amen.

²⁷ Tuto yaka ya—mwa manzibwana cwana kikuli: *Kuya Kwande A Mafulo*. Ki tuto nyana cwalo, ye ipitezi cwalo, kono, mwa ziba, hañata lufumana Mulimu mwa lika ze ipitezi. Lifasi liinzi mwa lika za sizo, kufitela, kuba ni sika se si sa zibahali kuzwa kwa lika ze zibahala, kipeto liba za buipiteli.

Sina hane Ni kutilize kwanu mazazi nyana a fitile, kwanu kwa tabernakele, ka: *Za Buipiteli*. Mi mulimi ki ya muipiteli ku wa muuna wa pisinisi; muuna wa pisinisi ki muipiteli ku mulimi. Mukreste ki muipiteli ku mulum...ya sa lumeli, ni zeñwi cwalo. Una ni kuba sikuba sa mutu yomuñwi. Kacwalo, sika kaufela se si ipitezi, si ka mi eza kuba sikuba, ku ya—ya ka mikwa ya kamita.

²⁸ Mi kabakaleo, sicaba sa Mulimu, ni bapolofita ba Hae, ni balumiwa ba Hae—ba Hae mwahala lusika, bene ba lwala Liñusa la Linzwi la Hae, ne ba talimwa kuli ki likuba, ku ba kwande.

²⁹ Nuwe nali sikuba, kwa lifasi la hae la zibo yetuna lona la na kutaza teni. Nuwe...Kaniti nali sikuba, ku Faro; ahatile liutu la hae fa lubona mi ni ku zwa fateni, bakeñisa sikkwata sa balubi ba sileze, sina mo ne ba hupulela. Mi Jesu neli sikuba, kwa sicaba. Mi ni babañwi kaufela bene ba belekile ni ku pilela Mulimu, neba talimwa kuli ki likuba. Neba na ni kuya kwande a mafulo o ne bali ku ona.

³⁰ Fa ni fa ka butuna, Ni kolwa ka kulumela kuli batu haba tahi ku Kreste.

Cwale, Ni teni mo ka kulika kutusa mwa mukwa kaufela o Nika kutusa ka ona, ni kubulela litaba zaka kuba ze utwahala mo Ni zibela ku li u twahaliseza kaufela. Mi mu itiise ni na haiba mwakona.

³¹ Sina ha Ni talima ni kukutaza mwahala naha, ni kubona sicaba, Ni—Ni kolwa ka kutala kuli batu ha ba tahi ku Kreste. Mi Ni lumela kuli ki sila ya sweli kukenya kusittatala ko ku

cwalo. Kakuli, libaka le Ni lumelela cwalo, ha ki Yena sika se ba supezwa ku sona. Hakulata ba supelizwe kwa—kwa—kwa litumelo, kamba tuto yeñwi, kamba kwa katengo, kamba kwa kutwisiso yeñwi, kamba kwa maikuto a mubili, kamba nto yeñwi ye cwalo, kufita ku supezwa ku Kreste, yena Linzwi.

Ki kabakaleo Ni nahana kuli batu ba yendekile bukamuso bwa bona bwa Kuyakuile fa lituto za litumelo, kamba maikuto amañwi a mubili. Sina, babañwi mo ba bulelelanga, “Ni binezi mwa Moya. Ni—Ni bulezi ka malimi. Ni—Ni—Ni utwile mulilo o suluhela kuna.” Mi kana mwa ziba, lika zani kaufela za kona ku likanyiswa ki diabulosi?

³² Kuna ni fela nto iliñwi ya sa koni ku likanyisa, sani ki Linzwi. Mwa likaňi, mwahala hae ni Jesu, nako ifi kaufela Jesu na mu komile. “Ku ñozwi,” kona Linzwi!

Mi Ni lumela kuli, kacenu, libaka leo batu ba sateli ku Kreste, kakuli ba supezwa, buñata bwa bona, kwa ko—ko—ko kopano. “Mutahe mu to i kopanya kwa keleke ya luna.” Kamba, “Mubale katekisema ka luna,” kamba, “Mulumele tuto ya luna,” kamba—kamba milao yemiñwi ye cwalo. Ba supezwa mwa nzila ye fosahalile. Mi likezo za bona ni bupilo bapila kusina Kreste, za pakiwa mwa bupilo bwa kasibili, za iponahaza ka sona sika sa teni luli.

³³ Ka mutala. Hani lati ku holofaza maikuto a mutu. Kono, kwa mulaho ni kwa pata, mwahala naha, Ni nyazize basali baba pumela milili ya bona ku ieza ye mikuswani. Yani ki Bibe. Ni nyazize basali baba tinanga tuputula, baba itusisa mipende. Mi kono mwaha ni mwaha lizamaya li ekezeha. Li bonisa kuli kuna ni munwana omuñwi, kokuñwi, o ba supeza kwa nzila isili. Mi ha ba tahi kuli bafite ku Kreste.

³⁴ Mi ba bulela bali, “Lu ba siemba sa keleke. Keleke ya luna haina . . .” Hakuna shutano ni yekana ka zeo likeleke za mina li lumela.

Mulimu naize, “Ku fosahalile.” Mi kambe ne ba ka fita ku Kreste, ne ba ka tuhela sani. Mi, isiñi sani fela, kono mutu ukona kunga sibaka sa hae kambe fela na ka fita ku Kreste, mi hape a lwanise sani. Baana baba nyezi ne ba si ke ba tuhelela basali ba bona kueza ze cwalo. Muuna sakata ha tabeli kuli musala hae aeze ze cwalo.

³⁵ Mutangana yomuñwi mwa muleneñi, ka zazi leliñwi, ne si batile ku bulaya bashimani bababeli bani. Ne ba inzi fa sibaka sesiñwi sa kunwela mafula. Mina sicaba sa Jeffersonville ne mu li boni mwa mutende. Mi musizana yomunyinyani yo a matela fa sitishini sa mafula a limota, kusina sa na tinile, ni hanyinyani, mapunu punu, mi bashimani bababeli bene bainzi fani ba bulela fateni. Mi mubeleki wa fani abata ku bulaya bashimani bababeli bali; mi ba mu tama ka zona, ni ku mubeya mwa kuta. Cwale muatuli a mubuza, “Kiñi ha no . . . hana tinile cwalo?”

Mi ali, “Ni sepa u bonahala hande.”

³⁶ Cwale, kuna ni se si fosahalile ni muuna yani. Hanina taba kamba ki... Haiba ki muezalibi, kuna ni se si fosahalile ku yena. Lilato la hae ku musali yani halikoni kuba la niti, ni ku mubeya kuba siteo cwalo. Kuna ni nto ye fosahalile. Kana mutu akile ataha fa sibaka sa ku kona ku atula mwahala bunde ni bumaswe?

³⁷ Kana muboni litino ze nca za kutapela ze balekile? Kana mwa ziba ku nuha kwaka kuli basali kwa mafelelezo ba ka to fita fela fa matali a feiga, myaha ye mashumi amalalu ka ye milalu kwa mulaho? Mi cwale bana ni bona baba tina matali a feiga, likoci ze belela. Linzwi la Mulena ha li palelwi. Mwabona? Mi sani ne si na ni ku ezahala ku sikaba kale nako ya mafelelezo, batile kwa litali la feiga hape. Neni sweli kubala ka zona mwa mutende wa ba *Life*. Zeo ne libulezwi ka myaha ye mashumi amalalu ka yemilalu kwa mulaho, mane basali ba si ka wa kale. Ne ku bulezwi mo ba ka ezeza mwa lizazi la maungulo le, mi ki ba bateni fa. Mo ne batinela liapalo sina baana, ni mo ne ba ka... Buiswalo bwa basali buwile mwa naha ye.

³⁸ Naha ye kwatasi hahulu mwahala linaha kaufela za lifasi, ki yona America yee. Ki yona ye masila hahulu mwahala sikuwata kaufela. Zeo ki kuya ka lipatisiso. Palo ya linyalo ni telekano ki yetuna kufita sibaka sesiñwi kaufela mwa lifasi, ni muinelo wa naha ifi kaufela. Ne lu kopisanga kwa France, busafa ni masila a naha yani, mi cwale se ba kalile kulikanyisa mitinelo ya bona ku luna. Ne lu hatezi kwande a miseto ya bona.

³⁹ Ni ziba kuli kuna ni libaka leo batu haba tahi ku Kreste. Haiba neba ka eza cwalo, ne ba si ke kueza ka nzila yani.

Jesu na nyandezi kwande a munzi, kuli Akone ku kenisa sicaba sa Hae ka Mali a Hae Luli. *Kukeniswa*, lizwa kwa linzwi la Sigerike, manzwi amabeli, ili kutalusa, “kukena, ni ku beiwa kwatuko kwa musebezi.” Mi cwale Mulimu ha kenisa sicaba sa Hae ka Mali a Jesu, Wa ba kenisa kuzwa kwa masila a lifasi ni kuba beya kwatuko kwa sebelezo.

*Kabakaleo Jesu ni yena, kuli a kenise sicaba ka mali a
hae tota, u utwile butuku kwanda munyako wa munzi.*

⁴⁰ Nihaiba kwa sicaba sa Evangelii Yetezi, si kutezi hape mwa mukoti o ne ba zwile ku ona. Keleke ya Pentekota neli sikamañi, myaha ye mashumi amane kamba aketalizoho kwa mulaho? Neba lwaha, ni ku nyaza, ni kubona likeleke bukuba ze ne ba zwile ku zona, ona likopano zani. Ki sikamañi sene ba eelize? “Kuswana fela inge njia kwa mataza a yona, ni kulube kwa sileze sa yona.” Ba kutela hape mwa sibaka se siswana mo ne ba kumuzwi, mi cwale likeleke za bona litezi fela masila sina zeñwi za zona.

⁴¹ Neli nto yeñwi, sina hane Ni bulezi kakusasa cwana. Sina, batu ba swana ni Pitrosi yana ize, ku Muñoli—Muñoli Mateu 17:4

kuisa fa 8, fa na bulezi kuli, “Ki hande kuba kwanu. Halu yaheni litabernakele zetalu.”

⁴² Kono Moya wa ba hanisa kuli basike baeza cwalo. Ali, “Yo ki Mwana Ka ya latwa; mu Mu utwe,” mi ki Yena Linzwi. Yo ki Yena yo lu lukela kutalima ku yena, yena Linzwi, isiñi ciseho ya luna ka nto isili. “Ki yena Linzwi la Ka; mu Mu utwe!” Mi ki sikamañi sene ba boni kasamulaho wa Linzwi kubulela ku bona? Nihaiba Mushe ni Elia ne ba siyo; mane nekusina nihaiba tuto ya litumelo; kamba nihaiba kuba sesiñwi kwanda Jesu fela ki yena yana siyezi, mi ki Yena Linzwi. Ki zona fela ze ne ba boni.

Cwale, “Kuya kwande a mafulo.”

⁴³ Lu fumana kuli mwa mafulo a bona kone ku ezahalezi taba tuna ye, fahalimwa Lilundu la Kubenya, sina Pitrosi hana bizize sani kuli, “lilundu le likenile,” kwa Na kopani ni bona. Cwale, Ha ni lumeli kuli muapositola na talusa kuli lilundu ne li kenile; na talusa kuli neli Mulimu ya kenile yana li fa lilundu.

Ha ki keleke ye kenile; ha ki sicaba se si kenile. Ki Moya o Kenile mwa sicaba. Moya o Kenile u kenile. Ki yena Muzamaisi ni Mueteteleli wa hao.

⁴⁴ Mi lufumana kuli, mwa mafulo nyana ani fahalimwa lilundu, la Kubenya, hane ba lukisizwe ku utwa, nto fela yene ba lumilwe kueza neli ku teeleeza kwa Linzwi. Nto fela yene ba boni, ne si tuto ya litumelo. Nekusina se ne ba boni sisili kwanda Jesu, mi Yena ki Linzwi leli ezizwe nama.

Haki nto kwa bunde ni yeo, kwa mafulo a swana mwa simu ya Edeni. Mi Mulimu hana file Keleke ya Hae mata mwa simu ya Edeni, sicaba sa Hae, ne banani limota kone ba lukela kuina kwa buse; lani neli Linzwi. Neba na ni tebe iliñwi, silwaniso silisiñwi, nto iliñwi, kakuli Mulimu na zibile sene si ka koma diabulosi, mi lani ki Linzwi.

⁴⁵ Jesu na ezize nto yeswana. “Ki lona Linzwi; ku ñozwi.” Mi Satani alika ku-ku Li zwakanisa, isiñi ku Li toloka ka mo liinezi; ku Li zwakanisa ka Yena. Mi Jesu ali, “Mi hape ku ñozwi.” Cwale, lu swanela kupila ka Linzwi lani!

⁴⁶ Mi mwa mafulo nyana ani one ba na ni ona kwani, bo Pitrosi, Jakobo, ni Joani; ni Jesu, Mushe, ni Elia. Mi ni mwa mafulo abona ba bona nyangela ya Lihalimu ya muluti, kamba Siita sa Liseli se ne si lepelela yene tilo bonahalisa kubenya kwa Mulena Jesu. Mi hane ba itukiseza kuyaha kopano, iliñwi ibe ya mulao, mi yeñwi ibe ya bapolofita, ni zeñwi cwalo, mi Linzwi lali, “Yo ki Mwana Ka ya latwa; mu Mu utwe.” Mi, ku ze ne ba lumilwe, neli swana fela sina mwa Edeni, “Mupile ni Linzwi!” Ani kona mafulo a Mulimu a sicaba sa Hae.

⁴⁷ Ku bonahala, kacenu, kuli ki lizazi fo batu haba sweli kuzwela kwande a mafulo. Mwa lika kaufela, baswelli kuzwela kwabuse.

⁴⁸ Mwa ziba, Ne ni bulelezwi, linako za kwa mulaho, kuti ba nani fulai ya jeti cwale yekona... ye ezanga lilata hahulu le lu utwa kwetu, o nyanganyisanga mahaulo. Ki nako ya kuli fulai se ifitile fa lubilo lolutuna hahulu kuli mane iutwahalisa mulumo wa yona kafa ni kafa, ze tibela mulumo. Mi cwale ha ifitelela mulumo wa yona fo utibelwa, mane ku bonahala kuli hakuna fo ipalelwa kufita.

Mi Ni nahana kuli, mwahali mwani, luna ni tuto. Halu ya kwahule ni fo kufita mulumo wa luna, kukena mwa Linzwi la Mulimu, kona kuli hakuna fo ku palelwa ku sa kona kueza Mulimu ni mutu ya itukisize kuya kwande a mafulo, mafulo a mutu, kona cwalo. Cwale, lu bona kuli, kuya kwande a mafulo, kuya kwande a se.

⁴⁹ Ni bona Satani, hape, u isa sicaba kwande mafulo a munahano o i ketile, kwande a—a—a—a mafulo a—a zibo ye swanela. Satani unga sicaba sa hae kwa neku leliñwi, kwande a mafulo; Mulimu unga sicaba sa Hae kwande, kwa neku le. Mi Satani uba isize kwande a mafulo a muikutekelo. Ha si fita fa sibaka sa kuli sicaba... mi bakona kuba ni kezo ni kueza, ni ku zwelapili mwa lika ze ba sweli kueza kacenu mwa likalulo za muikutekelo. Li fitelezi mihupulo yaka kuli muuna wakona ku siya musala hae kwande cwalo, yaka tina cwalo, ni ku bakula mutu yana ka mu lwaha. Li fitelezi ngana ye swanela. U lukela kuziba hande kufita zeo. Kwande a muikutekelo o swanela! Si kai sibaka fa ku yemela?

⁵⁰ Muuna yomuñwi ni musali wa siyemo saka, Na kona ku mi buza cwana. Ku cwani haiba boma kamba boma mina, ka myaha ye mashumi aketalizoho a fitile, na zamaya mwa nzila ni kaputula kamba kanekunda, kamba mu libiza cwani, za kutina? Mula no ka ba nanula, kapili, kono ki ku ba kenya mwa buino bwa bupulumuki. Kalibe yani a zwa mwa ndu ya hae kusina litino za kwa halimu, mi na kaba mwa buino bwa bupulumuki, kakuli ngana ya hae i bonisa kuli kuna ni se si fosahalile ku yena. Mi haiba neli ze amana ni booko ka kueza cwalo ka linako zani, luli ki sisupo sa kuli sesiñwi si lyangani. Isali kutokwa ngana niteñi, kuya kwande a munahano; masila!

⁵¹ Mi cwale mutu ha zuba kwai, mi madokota ba bonisize ku yena kuli likitikiti ba shwa mwaha ni mwaha kwa buino bo bu swana, mi ba kona kufuta makwai kwahule, ku bonahala kuli kuna ni se si fosahalile mwa munahano wa mutu yo.

Mi cwale mutu ha lyangani mwa toho, mi hakoni... hakoni kuijeta hande hamoho, sa eza, uka alunguta mwa ofisi ifi kaufela ya dokota yeliteni mwa nahe, ku fumana se si fosahalile ku yena. Kono cwale uka yo yema fa sipi kamba fa mota, ni kunwa kufitela a takana kufelelela; ku sinya masheleñi a hae, fa ku ikenya mwa lika zani. Mi hana ka bonahala kuli ukena ku zona kusina ku kolwa ka bucwala, kona kuli uka sinya pene

kaufela ya fumana, mwa ofisi ya dokota, kulika ku fumana se si fosahalile ku yena. Ha lina buino bwa ngana.

⁵² Hane kuka taha maankoli ye pamula likuhu ye sweli ku fufa, mi kipeto Ni nga tobolo yaka, ni kuya kwa mulaho wa ndu ni ku kunupa maankoli yani, mwa mizuzu ye lishumi kuzwa fani Ni ba mwa tolongo. Neba ka ni tama, “Ka—ka kueza ka butanya; bakeñisa kuswala tobolo mwa tolopo; ki ku mbemusa bupilo bwa batu, ka tobolo, ku kunupa maankoli mwa halimu.” Neni ka bulaya mutu, neba ka bulela kuli. “Una ni ku lelekwa.”

Mi bakona kulekisa mutu bucwala bo buñata kuli mane a kolwe, ni ku mubeya mwa mota yene ka bulaya lubasi kaufela ku feza. Mi cwale ha swelwi, u fiwa madollar a ketalizoho ni mulatu. Ki bubulai bwa kufumba! Ki butata mañi bo buli ni lifasi? Kuna ni se si fosahalile kokuñwi.

⁵³ Cwale, “kuya kwande a mafulo,” kwande a buiswalo bwa mitinelo, kwande a minahano ye swanelo.

Mu lemuhe, batu ba lipolitiki ba luna kacenu kuli hakuna ze ba ka bulela ka za kubala Bibele mwa likolo. Ba saba. Ha ba zibi ko ku fukela moya. Ha ba zibi kamba ba ka luza maboti, kamba nee. Lu tokwa Abraham Lincoln yomuñwi. Lu tokwa John Quincy Adam yomuñwi. Lu tokwa yomuñwi ya ka yema, hakuna taba kamba moya u fukela neku lifi, ni kufa buikolwisiso bwa bona.

⁵⁴ Kacenu, mukutazi wa kopano, ni ha mu ka mu bonisa mwa Linzwi, ka za Niti, ha zibi sa kueza. U saba kuli uka latehelwa ki tikiti ya hae ya sico. Lu tokwa baana ni basali kacenu ba batiile ka za Evangeli, mutu ya kona ku yema ni kubulela buikolwisiso bwa hae, ku supa ze lukile ni ze fosahalile, kamba Linzwi la Mulimu li lukile kamba mwendi kopano kona ye lukile.

⁵⁵ Jesu naize, “Manzwi a mutu kaufela abe buhata, mi a Ka abe Niti. Lihalimu ni lifasi li ka fela, kono Manzwi a Ka hana kufela.”

⁵⁶ Kacwalo, mwa bona, ba ya kwande a mafulo a Linzwi la Mulimu, kuli bafumane kalabo ya bona. Luka...na ba... hapelelize kuzwa mwa mafulo a Linzwi la Mulimu, sina mwa na ezelize Eva mwa simu ya Edeni, Satani u ezize nto yeswana kacenu. Ku lukile. Lu fumana ona cwalo. Batu ba hapelezwa mwa lituto za litumelo za bona ni lituto za litapelo za kwande a mafulo, mwa mafulo a bona a lituto za litapelo ni lituto za litumelo. Bana ni mafulo, hape, mi sani si ba beya mwa mafulo a bona. Sa hae yena ki mafulo a tuto, za bumulimu, za misebezi, za digiri ya dokota, za tuto, za butu, lika kaufela ze lwanisa mafulo a Linzwi la Mulimu. Mulimu una ni mafulo a sicaba sa Hae. Kopano ina ni mafulo a yona.

⁵⁷ Myaha ye likiti zetalu kwa mulaho, mutu na kopana ni Mulimu kai kamba kai. Neli nto ye zibahala kuli mutu a kopane ni Mulimu. Kono ki kabakalañi haba sa kopani ni Yena kacenu?

Kuna ni batu babañata, ki likiti kitu ni ma milioni a batu ba babañata kufita mone kuinezi ka myaha ye likiti zetalu kwa mulaho, mi kanti Mulimu uba nto yeñwi fela ya kwa kale ye ambolwa fela, litaba zeñwi za kale. Ha ba kopani ni Mulimu, ka butu, inge mo ne ba ezelize myaha ya kwa mulaho, sina mo Ni bulelezi, likiti zetalu, myaha ye likiti zetalu kwa mulaho. Haba sa eza cwalo. Haisali nto ye zibahala kuli mutu a kopane ni Mulimu. Haiba mutu wa bulela ka zona, uka talimwa kuli ki mutu wa sikuba, ya lyangani mwa booko cwalo. Halisa zibahala ku bona!

⁵⁸ Mwa taba ya Abrahama mi ni mwa mafulo a hae, kiñi, ne kubanga kuli zazi ni zazi Abrahama na kopana ni Mulimu. Na ambola ku Yena. Isiñi zeo fela, kono hane baile kwa Gerari, mwa musipili; lu fumana kuli, ona fani, Mulimu nali mwa mafulo ni Abimeleki, wa Mufilisita. Neli nto ye zibahala hahulu. Neba pila mwa mafulo a Kubateni kwa Hae.

Kacenu, ba ipilela mwa mafulo a bona bañi, mi habana sa kueza ni mafulo a Mulimu. Ha ba tabeli kueza sika ka sona, kakuli ki za tumelo ye fitelezi kwa lifasi. Ki za tumelo ye fitelezi ku bona. Kono, muhupule, fani Mulimu hana tomile mafulo apili kwa sicaba, Na ba tinisize Linzwi la Hae. U ezanga cwalo kamita. Kono, kacenu, mwa mafulo abona, ha ba sa eza cwalo. Kona libaka ha mu sa utwi zeñata hahulu ka za Mulimu. Cwale, Ni lumela kuli ma—ma mafulo ao . . .

⁵⁹ Sina Mushe, ka mwa Na kopanezi ni Mushe mwa lihalaupa. Mushe na nani mafulo kwande kwa na sweli kulisa lingu za mukwenyana hae, Jethro, kwa mulaho wa lihalaupa. Mi zazi leliñwi, ku mulisana wa kale wa lilimo ze eite za kupepwa, a bona Liseli, la Siita sa Mulilo mwa sicacani, si nze situka. Mi a kopana ni Mulimu; mutu yana mata kuzwa ku Mulimu.

Zazi leli tatama. Fokuñwi ku kopana ni Mulimu ku ka kutiseza kueza lika ze ipitezi. Mushe nali ya ipitezi, zazi le litatama. Na beile musala hae inge ainzi fa mule, ni mbututu fa noka ya hae; ni mulelu wa hae o mutelele inge u lepelela, ni kota ye sikami sikami mwa lizoho la hae, inza ya kwa Egepita, kuli ayo koma naha. Cwale, yani neli pono ye bukuba!

“Uya kakai, Mushe?”

“Niya kwa Egepita.”

“U yo eza sikamañi?”

⁶⁰ “Ni yo hapa!” Na sa kopano ni Mulimu. Neli kuhapa kwa mutu alimuñwi. Ne ku bonahalile kuba nto yenca. Kono, taba yateni neli kuli, na konile cwalo, kakuli na kopani ni Mulimu. Kuswana fela inge mutu alimumu yaya kwa ku hapa Russia; kona fela ze mutokwa, ki mutu alimuñwi mwa tato ya Mulimu. Mushe nali mwa tato ya Mulimu. Mi nana ni kota ye sikami sikami mwa lizoho la hae, isiñi mukwale; kono kota. Lika ze nca, Mulimu kona za ezanga.

⁶¹ Kono, muhupule, Mushe nana ni kuzwela kwande a mafulo mwa na pila, kuli akone kueza se, kakuli na pilile teñi kwani ni mpi mutumbi kono apalelwa kueza cwalo. Ni limpi kaufela za Egepita, apalelwa kueza cwalo. Kono zazi leliñwi Mulimu amu memela mwa mafulo a Hae.

Mi ali, “Ki Wena mañi?”

⁶² Mi ali, “KINA YA LI NA.” Isiñi, “Ya naliteñi, kamba ya kaba teñi.” Tensi ya cwale, “KINA! Kina Mulimu wa Abrahama, Isaka, ni wa Jakobo. Ni utwile sililo sa sicaba, mi Ni hupuzi sepiso ya Ka, mi ye ki nako ya se kuli si talelezwe. Na ku luma kwani, Mushe, ni kota ye mwa lizoho.”

⁶³ Neli sikamañi sani? Yena, cwale, batu ba hupula kuli mwendi na lyangani. Kono ki sikamañi sa na ezize? Na zwezi kwande a mafulo a hae. Faro na mu kenyize mwa sikolo ka myaha ye mashumi amane mwa sikolo sa mwa mafulo, mi a palelwa. Mi sa tanda Mulimu myaha yeñwi ye mashumi amane kuli ali zuse ku yena. Tuto ya hae kaufela ni lituto za litumelo za hae za na lutilwe, ne li tandile myaha ye mashumi amane kuli ali zuse ku yena. Mi cwale Mulimu aitusisa yena ka myaha yeñwi ye mashumi amane.

⁶⁴ Mulimu u banga ni nako yetata fa ku lukisa mutu wa Hae. Kono, mwa bona, Na si ka nga Mush- . . . a swala Mushe, kufitela Mushe azwa mwa mafulo a ku i pangezi mutu, kuzwa mwa muezezo wa busole, ni nzila ya nama mwa kuezeza lika, kuya kwa muezezo wa za moyo. Mi, hana keni mwa mafulo ani, Mulimu ki ha itusisa yena.

⁶⁵ Cwale, lu fumana kuli mwa lihalaupa le . . . Lu lemuha hane basweli hande ni kuyema, ni kuzwa mwa Egepita, mwa mafulo a Mulimu; ba zwa mwa mafulo a baprisita ni bona kaufela inge bali, “Muítikise ili mina ka batanga, kwa nako ye silezi.” Mi cwale Mushe mupolofita ataha mi a to paka Linzwi la Mulimu kuli ne li sutelezi bukaufi, yena Mulimu ya Na file sepiso naliteni fani kuli a lamulela sicaba sa hae; ba zwiswa mwa mafulo ao nebali ku ona, kukena mwa mafulo a Linzwi la Mulimu lene li sepisizwe mwa hola ye. Neba lumela ku mupolofita yani, kakuli sisupo sa bupaki ne si bonahalisa kuli neli Linzwi la Mulimu ka kutala. Ni lika za na ne li bonisa kuli neli niti, ni Siita sa Mulilo sa mu latelela mwa mulaho, ni ku paka kuli neli Linzwi la Mulimu.

⁶⁶ Cwale, mwa mafulo aa, limakazo, lisupo, ni ze komokisa neli ezwa mwa mafulo.

Ba li kasheza mwa lihalaupa. Ne ba siile mafulo a bona a mande. Ne ba siile mafulo a sileze. Ne ba siile mafulo a yahilwe ka sileze ni masitina, ku yo pila mwa litende kwande mwa lihalaupa, kone kusina buloto kamba sika kaufela. Fokuñwi Mulimu ulu tokwa kuli lu eze lika za bukuba, kuya ka minahano

ya luna. Mi haiba mu zwela kwande a mafulo a munahano wa mina, sani kona sibaka ko mu ka fumana Mulimu.

⁶⁷ Mulemuhe, hane baile mwa lihalaupa, neku na ni limakazo, lisupo, hane ba zwile mwa mafulo. Cwale amu hopule, ba si ya mafulo a Egepita ni kuya mwa lihalaupa ni mafulo a Mulimu. Kana muziba cwani kuli nekuli cwalo? Mulimu naize, “Sicaba sa hao si ka yambaela ka myaha ye mianda yemine, kono Ni ka ba lamulela ka lizoho leli mata, mi Ni ka bafa na ha yee.” Mi nebali mwa musipili wa bona, ka Liseli lene li pakilwe, yena mupolofita ya pakilwe, ka lisupo, ze komokisa, kuli Mulimu nali mwa mafulo, mi nebali mwa musipili wa bona. Neba na ni Siita sa Mulilo. Neba na ni mupolofita. Neba na ni manna. Neba na ni mezi a pilisa. Amen! Neba cincize, ku cinca libaka za mafulo a bona. Neba na ni kueza cwalo. Neba si ka bona lika zani mwa Egepita. Neba na ni ku cinca libaka za mafulo a bona, fa kuli ba bone za moyo za buipiteli.

⁶⁸ Kona mo ba ka cinceza ni batu ba lizazi le kuzwa mwa mafulo a likopano zeli, “Mazazi a limakazo a felile. Hakuna nto ya kuli kolobezo ya Moya o Kenile. Mi ni Mañolo ao kaufela a fosahalile; mi a beleka mwa lusika lusili.” Mulukela ku cinca libaka za mafulo a mina, muzwele kwande a mafulo ani, kuya ko lika kaufela li konahala.

⁶⁹ Kaufela zona ne li paka Kubateni kwa Hae mwa mafulo. Cwale amulemuhe cwale, bona, kasamulaho ba mano ipangela mafulo a butu ka lizo ni lituto za litumelo, kasamulaho Mushe amano shwa. Mi Mulimu aeza ni sicaba ka myaha ye miñata. Mulimu ha yo mwa mafulo a Hae, ni hanyinyani, mwa mafulo a bona, kakuli neba ipangezi mafulo a bona, mafulo a kui pangela.

⁷⁰ Muhupule, hane ba bizizwe kuzwa mwa Egepita, Mulimu na ba lukiselize mupolofita, a ba lukiseza ngu ya sitabelo, aba lukiseza ze ne ba tokwa kaufela; linzwi, sisupo, makazo, mupolofita wa ku ba zamaisa, swalelo yene ba sileleza, Siita sa Mulilo kuba zamaisa. Mi ba kena mwa lihalaupa, niteni ne ba si ka ikutwa ku likana. Neba bata sika sene ba ka eza, bona kasibili. Sishemo ne si ba ezelize zeo; cwale ba bata se ba ka eza, bona kasibili, kuli baba ezeze katengo, mi ba fapahane ni kulwana ni ku shutana, kuli ki mañi yana kaba muprisita yomutuna, ni yana kaba *se, sani, kamba sesiñwi*. Zazi leliñwi, Mulimu ali, “Mushe, ikauhanye kwateni uzwe ku bona,” mi A ba miza fela mwa kubulela ze sina tuso za Kora.

⁷¹ Cwale amulemuhe, ona lisupo ze kaufela ni ze komokisa ne lipaka Kubateni kwa Hae.

Mi aeza . . . mutu a ikezeza mafulo a hae, mafulo a lituto za litumelo ni sizo, isiñi mafulo a Mulimu a Linzwi la Hae. Neli mafulo a bona bañi! Nana ni ku ba siya, kakuli ki Yena Linzwi. Hakoni kuina ko kuna ni batu baba lutilwe za kwande a Linzwi

le. Mulimu hakoni kuina mwa mafulo a cwalo. Hakoni. Ali kuba aine ku ona. Una ni kuina ona fela ko kuna ni Linzwi la Hae.

⁷² Hana Na ni kuzwa mwa mafulo ani, cwale, a mwahala sikwata sa batu sani ba Na zwisize mwa Egepita, Na pilile fela mwahala bapolofita ba Hae, ku bao Linzwi la Hae ne li tile. Linzwi ne li tile ku mupolofita, ku to paka hola yani. Na pilile mwahala bapolofita, ni kupatulula kwa bapolofita. Mone ba lwahela, sicaba, ni ku lwaha lika zani. Mi Mulimu aba luta milao ya Hae ni nzila ya bupilo. Mi batu ne ba li lwanisa kamita, ni ku nyandisa mupolofita, mi mafelelezo ba mu pwacaula ka macwe, kamba ku mu saha mwa liemba emba, ni ku feza za hae.

⁷³ Jesu naize, “Ki mañi kwa bapolofita yene ba si ka bulaya bo kuku amina? Ki ufi wa bona, wa baba lukile yana lumezwi ku bona?” Mi ali, “Mueza misebezi ya ndata mina.” Na sa buleli ku ba swalisano. Na bulela kwa baprisita, batu ba likopano, Bafarisi ni Basaduki. Ni lemuha kuli linzwi la Hae na li sika cinca hahulu busihu bwa kacenu, konji kuba fela le maswe nyana, mwendi, ku bona.

⁷⁴ Cwale, lu fumana kuli Na pilile mwahala bapolofita ba Hae. Mi ki ha ba muenyi ku bona, kakuli Yena upila fela mwa Linzwi la Hae, kuli a Li pake. Bibebe ibulezi kuli U tomela Linzwi la Hae, kuli a Li pake. Ulika ku fumana mutu yomuñwi.

Kambe Na ka ba fela ni mutu wa pilu fahali, inge Samisoni. Samisoni na file mata a hae ku Mulimu, kono afa pilu ya hae ku Delila. Kona mo lu ezezanga hañata cwalo, kacenu, kufa fela sika ku Mulimu, kono isiñi kaufela. Kono, Mulimu ubata luna kaufela.

⁷⁵ Kuswana sina mulao wa litaba za bupilo, hamuba ni mulao wa tumelelano ya bupilo, mwakona kuba ni silelezo yetuna. Mi seo kona se i lu ezeza sepiso ye fuyozwi yee. Ki mulao wa bupilo ka kutala. I apesa kaufela ze lutokwa mwa bupilo bwa boo, ni zuho ya luna, ni Bupilo Bobusafeli. Ina ni lika kaufela.

⁷⁶ Mulemuhe, Mulimu na inzi kwande a mafulo a bona ka myaha ye mianda yemine. Kiñi? Na sina bapolofita. Kuzwa ku mupolofita Malaki, ku mupolofita Joani, myaha ye mianda yemine, nekusina ku fetuha kwa liwili kokuñwi lana fetuzi Isilaele. Mulimu nali kwande a mafulo. Ba Mu nepela kwande, ka lituto za bona za litapelo ni buitati, ni shutano ya bona kwa Linzwi. Myaha ye mianda yemine kusina Linzwi! Kuzwa ku mupolofita alimumu kuya ku yomuñwi, A zamaya, kufitela mupolofita wa mafelelezo Malaki, mi cwale nekusina mupolofita yomuñwi ka myaha ye mianda yemine.

⁷⁷ Mi cwale Mulimu ataha ato iponahaza hape. Zazi leliñwi A zamaya ni bona hape, kono lizo za bona ne li ngile hahulu sibaka sa Hae mwahala bona, Nali muenyi mwahala bona. Lizo za bashemi bo ndate ba kale, neba nani likotolo za kutapiseza, mi—mi ni mwa ku utela milili ya bona, ni kutina likunupo zeñwi

fa liapalo za bona, ni baprisita ba bona—liapalo za baprisita; mi—mi alimumu ki Mufarisi ya tiile, mi yomuñwi ki Musaduki. Mi yani na ngile sibaka sa Linzwi mwahala batu bani, kufitela, mane Mulimu aba potela, Nali muzwahule.

⁷⁸ Mutuhele Ni bulele cwana ka lilato ni likute, kono kuli mu utwisise. Ki nto yeswana ni kacenu. Ha isika cinca ni hanyinyani. Mi Yena ha tahanga mwahala sicaba, mwa mata a Hae ni ponahazo, ili ku bonisa kuli Linzwi la Hae ki le liswana maabani, kacenu, ni kuyakuile, kakuli Ki yena Linzwi, batu ba bulela kuli, “Ki mulauli, ki Baalezebubi, ki wa Jesu fela, kamba—kamba nto yeñwi ye cwalo.” Sikwata sesiñwi kusili, kono ina ni kuba ka nzila yeo.

Mwabona, halusika ba ni mupolofita cwale ka myaha ye likiti zepeli. Bamacaba haba si ka ba ni yomukana, mwa ziba; ya sepisizwe kwa maungulo. Cwale, lwa ziba cwalo, ka Mañolo. Lwa ziba cwalo, hape, ka litaba za kale kuli zeo li sepisizwe ku luna.

⁷⁹ Cwale, kasamulaho wa mianda yemine, Mulimu a zamaya mwahala bona zazi leliñwi. Kuya ka Mañolo, Na nani ku eziwa nama mwahala bona. “Libizo la Hae uka bizwa Muelezi, Mulena wa Kozo, Mulimu Yamata, Ndate wa Kamita.”

Mi cwale ha Na tile mwahala sicaba, se bali, “Haluna kulumela kuli Muuna yo alu buse! Ki—ki kadi ya kopano mañi ya Nani? Ki kopano mañi yene Mu lumile?” Na sina swaliso. Keleke kaufela kwa Na ya, neba Mu kasheza kwande. Neba sina sa kueza ni Yena, kakuli Na si alimuñwi wa bona.

Mi mone kuinezi ka nako yani, kona mo kuinezi cwale! Bibele ibulezi kuli keleke ya Laodesia ika Mu kasheza kwande, mi Na sweli kukongota, ulika kukena mwahali. Kuna ni se si fosahalile kokuñwi.

⁸⁰ Cwale, kiñi? Neba ezize mafulo a bona. Bona, kambe ne ba zibile Linzwi, neba ka ziba Yo nali Yena. Jesu naize, “Kambe ne... Mubale Mañolo, kakuli ku Ona munahana kuli muna ni Bupilo Bobusafeli. Ki ona a mi bulelela Yo nili Yena!” Seo kona sa bulezi Mañolo. Cwale, “A paka ka za Ka. Mi haiba ha Ni ezi misebezi yene sepisizwe kuli Ni eze, haiba ha Ni ezi misebezi Yeo Ndate, yena Linzwi... ‘Kwa simuluho ne kuna ni Linzwi, mi Linzwi nali ku Mulimu, mi Linzwi nali Mulimu. Mi Linzwi la eza nama mi ato yaha ku luna.’ Cwale, haiba ki Na Mutu yani, mubale Mañolo ni kubona se Ni lukela kueza. Mi haiba ha Ni swaneli; haiba misebezi ya Ka, yona misebezi ye pakiwa ki Linzwi, Ndate wa Ni paka, haiba nji ha paki Yo nili Yena, kona kuli Ni fosize.” Yeo ki niti. “Haiba ha mu Ni lumeli, mulumele Linzwi,” Na ize, “kona misebezi yeo Linzwi li eza.”

⁸¹ Mwabona, Nali muenyi mwahala bona. Neba sa Mu zibi. “Haluna za kueza ni Mutangana yo, ki Mutangana fela ya ipitezi yana pepezwi mwa sicelo kokuñwi.” Mi ba lumela kuli Bo mahe

neba bile ni Mbututu yo A sika pepwa kale, kamba mane Ku sika ba kale . . . na bile ni Mbututu yo ka ku mupepela mwa bonyazi, nitaluse. Mi cwale, bona, kuli Mbututu yani asika pepwa kale, mi kona a yo nyalwa ku Josefa; mi aeza cwalo kuli a zwise mubala o munsu ku yena, ona mukwa wa hae. “Mi Aba ya shutana Mutangana wateni, kakuli Nali mwana yana pepezwi mwa bonyazi, mi leo kona libaka ha Nali ya cwalo.”

Mi cwale Ha zwela kwande, ki sikamañi sa Na ezize? A wisezafafasi lituto za litumelo za bona, ku wisaka litafula za bona, aba nata kuzwa mwa sibaka sani, mi ali, “Ku ñozwi!” Amen! Sani ne si lukela ku paka Yo nali Yena. “Ku ñozwi!”

⁸² Kihande, habana sa kueza ni Mutangana ya cwalo yani. Kono mwatasi mwahala lipilu za bona, neba zibile hande Yo nali Yena, kakuli Nikodema na bulezi cwalo hande patalaza kuli. “Muluti, luna, Bafarisi, lu ziba kuli u muluti ya zwa ku Mulimu, kakuli hakuna mutu ya kona kueza lika zo eza haisi Mulimu abe ni yena.” Kiñi hane ba si ka Mu bulela ka za hae? Kakuli mafulo a bona na tomile miseto ya teni. Ne lisa Mu lumelezi kukena mwa mafulo. Ne li sa lumelezi kuli mutu a zwele ku Yena. Ne bana ni mafulo a bona bañi. A taha busihu, ni sikwalo sa kwalwa. Kono lu fumana kuli na konile, a Mu katana, niteñi.

⁸³ Eeni, ki nto yeswana ni cwale! Bana ni . . . Sa bile mueñi, muzwhahule. Haba Li utwisisi. “Ki kabakalañi se hane si kaba cwana, mi ki kabakalañi *sani* hane si kaba cwalo?” Kanti, Linzwi lona Kasibili li paka kuli se ki sona luli se si lukela ku ezahala mwa lizazi le. Mone lufitezí ku zona, ku kuta kutela, kono ki Niti.

⁸⁴ Nali cwalo, ku bona mwa mafulo a bona, “Mufitelezi wa tumelo, mulobi wa lizo za bona, mu filikanya wa likeleke za bona, luli neli fela mulauli, ñaka wa kamutumwa ya bizwa ‘Baalezebubi.’ Sani kona sa Nali sona.”

Na lumela, haiba Na ka taha mwahala luna kacenu, Na kaba nto yeswana, ku luna. Kakuli, luna ni sizo, luna ni kopano, mane halukoni ku kopana hamoho ni babañwi. Kiñi? Kuna ni fela sibaka silisiñwi ko mutu akona kuba hande, sani, ki mwataswa Mali. Mi Mali a suluha, kakuba kokwani ya bupilo, kuli i melise Peu ye, lona Linzwi. Kwande a sani, miseto ya likopano za luna ikana ibeya batu kwande.

⁸⁵ Kono Na kaba muenyi kacenu. Na ka bizwa nto yeswana. Na ka likanyiswa, Na ka beiwa kwande a mafulo. Mi kana mwa ziba . . . Yona Bibele ye swana yene bulezi kuli Uka haniwa ki batu, “ki Mutu wa manyando, ya twaezi maswabi,” mi u hanilwe, “mi lwa Mu talima kuli ki ya natilwe ni kuholofazwa ki Mulimu,” ki ona Mañolo luli a bulela cwalo. Yena mupolofita ya swana abulela kuli, “Mulimu wa Ka, Mulimu wa Ka, kiñi ha U Ni tuhelezi? Masapo aka, kaufela bona ba Ni talimezi. Ba tabile mazoho a Ka ni mautu a Ka.” Hane ba opela pina yani mwa

keleke; Sitabelo sa bona, yena Mulimu yene ba hupula ne ba sebeleza, ki yena yene ba kokotela.

Kona mo kuinezi kacenu, ki yena Mulimu ya swana!

⁸⁶ Mutualime sa na bulezzi mupolofita, Amosi, fani ha taha mwa Samaria. Mi meto a hae amanyinyani aba a masisani hana pahami fani ni kubona muleneñi wa sibi wani, basali bali ku lobala mwa mikwakwa, ni baana, inge America ya kacenu. Mi hana talimile fahalimu fani, meeto a hae a bonahalela mwatasi. Mi na sina mutu wa ku mu tusa. Na sina kadi ya kopano. Mulimu na mu lumile. Kikuli batu ne ba ka teezeza Liñusa la hae? Batili, ne basike ku mu utwa. Kono a polofita, mi ki hali, "Yena Mulimu ya swana yo muipapata ku sebeleza uka mi sinya."

Mi Nili, ka Libizo la Jesu Kreste: Yena Mulimu ya swana yo naha ye i ipapata ku sebeleza, kuti ki naha ya bulapeli, yena Mulimu ya swana yo ba ipapata ku sebeleza uka ba yundisa mwa bumaswe bwa bona. Uka sinya kopano ifi kaufela fa lifasi mubu, yena ye ba ipapata kuli ba mu sebeleza.

⁸⁷ Kacwalo, mulemuhe, A ba kalimela, mi ba Mu nepela kwande a mafulo a bona. "Jesu a nyandela kwande a mafulo." Ba Mu beya kwande a mafulo, kwande, kwande a mafulo a bona.

⁸⁸ Lu fumana kuli Bibele ibulezi kuli, mwa lizazi le mwatasa Lusika lwa Laodesia loo, baka eza lika ze swana. Neba ka lelekelwa kwande a mafulo.

Cwale mutualime Sa bulela kuli uka eza cwale, ka kukwala.

"Ku lelekelwa kwande a mafulo," kone ku cisezwa sitabelo. Kwani kona kwa Na fumaneha. Nali yena Sitabelo.

⁸⁹ Cwale, muzwale, kezeli, kana mwa ziba kuli mañi ni mañi wa mina kaufela muna ni kufa sitabelo; mulukela kuba sitabelo sa Mulimu; kufa sitabelo sa lika za lifasi; ku itoboha minyaka ya mina ya lifasi; ku itoboha lika za lifasi? Mwa ziba libaka leo batu ba lifasi haba sike ba eza cwalo?

⁹⁰ Mwa ziba, ngu, haina sa kufa konji nto ilimu, mi zeo ki boy. Mi, cwale, ha i kupiwi kuli ipange kamba iikeyezeze boy. Bwa silimo se. I kupiwa ku ipa...ku iitahiseze boy.

Halu kupiwi kuli lukezeze nto yeñwi. Lu kupiwa kubeya miselo ya Moya. Fo kikuli, za mwahali a ngu, seili sona mwahali, kona se si panga boy. Kwande. Mi cwale hana ni Kreste mwahali, si mueza kuba sina Kreste kwande, isiñi za kutina fela kwande.

⁹¹ Kihande, lu fumana sani ha si ezahala, mi Kreste ha ka kuta, kana U ngiwa cwani? Kuswana fela inge mone kuinezi kwa simuluho. Kamita kubile ona cwalo.

⁹² Kacwalo, Na ba omanyize, kuli mane ba mu lelekela kwande a mafulo a Hae, mi ba Mu bona kuba muezalibi. Ili, "A ba sibi sa luna."

⁹³ Cwale, kasamulaho wa lilimo ze mianda, eeni, bukaufi ni lilimo ze likiti zepeli, U potezi mafulo a bona hape, kuya ka Linzwi la Hae la sepiso la Na ka eza mwa mazazi a maungulo. U potezi mafulo hape. U potezi mafulo, kuli a bonahalise Linzwi le kacenu.

Kuswana fela sina ha Na potile mwa lizazi lani, mi Aeza cwalo mwa lizazi Mushe. Yani ne si Mushe yana ezize sani; Mushe nali mutu. Neli Kreste.

⁹⁴ Mutualime ku Josefa, bupilo; yana latiwa ki ndata he, a toiya ki bana ba habo, kakuli nali muboni. Mi ne ba mu toile, kusina mulatu. Yani neli yona taba fela yene ba mutoezi.

Mufuta o lukela wa kacenu, luli. Keleke, hape, ba toile lika za moyo.

Mi lu fumana kuli na lekisizwe ka mali alikana ni lishekele za silivera ze mashumi a malalu, kuli a bulaiwe. Ba munga ku mubeya mwa ndu ya tolongo; sina Jesu mwa na bezi fa sifapahano. Muuna alimumu a bulaiwa, mi muuna yomumu a pila; mi a zwa kwani kuya kwa lizoho la bulyo la Faro. Kona ona cwalo Jesu mone ba mu ezelize.

⁹⁵ Neli Davida, ni kuya mwa mikwakwa, ni kulila, mulena ya hanilwe; ni kuina fa lilundu, a lilela Jerusalema. Yani nesi Davida. Yena Mwana Davida, myaha ye mianda nyana kasamulaho wa fani, aina fa lilundu le li swana mi a lila kakuli Na li Mulena ya hanilwe mwahala sicaba sa Hae Tota. Ki Kreste, kamita.

Mi, kacenu, ha ku polofitwa kuli Kreste una ni kutaha mwa mafulo, mwa ziba sene si ezahalile kana? Ku kaba fela inge mone kuinezi ka nako yani. Kuna ni kuba ona cwalo, ili ku taleleza Linzwi faa leli sepisizwe kuli Uka eza.

⁹⁶ Cwale muhupule, Kreste nali mwa lusika lwa Nuwe. Yani neli Kreste, "Jesu Kreste ya swana maabani, kacenu, ni kuyakuile," Linzwi leli hanilwe la hola yateni.

⁹⁷ Mulemuhe, mi bu polofita bwa Hae bwa Sinulo 3, bu fumaneha, ha Na ka taha mwa lizazi la mafelelezo le, sina mwa Na polofitezwi kuli Uka taha mwa lizazi la mafelelezo le. Mi kana Na fumani cwani keleke ya Laodesia? "Bufumu, hakuna se ne ba tokwa." "Mi aina sina mulena wa musali mi haba boni maswabi." "Ni ku Mu lelekela kwande a keleke," neba sina tuso ni Yena. Na zwezi kwande a mafulo hape. Kono he na sa zibi kuli u mapunu, ki sibofu, mi ki mwelwa; mi ha ba zibi.

⁹⁸ Hape, haiba Ataha hape mwa mukwa o swana sina mwa Na inezi ka nako yani, Na ka omania musali kaufela ya tina tuputula. Na ka omania musali kaufela yana kuta milili, sifateho kaufela se si pentilwe, muuna kaufela yana ka tuhelela musala hae kueza cwalo. Na ka yema, mi Na ka wisaka kopano kaufela yene kaba teni, ni kulobaka tuto kaufela litumelo zene kaba teni.

Mwa lumela kuli Na ka eza cwalo? [Kopano ili, “Amen!”—Mu.]
Luli na ka eza ona cwalo. Yeo ki niti.

⁹⁹ Ki sikamañi seba ka eza ni Yena? Ba Mu lelekela kwande a mafulo. Ka niti ne ba sa utwani ni Yena. Batili, sha!

¹⁰⁰ Cwale lwa Mu fumana hape, mwa lizazi le, sina Bibele mone i bulelezi kuli Uka ba cwalo, a lelekelwa kwande a mafulo. Kakuli Yena u siala ya swana, lona Linzwi, ya swana maabani, kacenu, ni kuyakuile.

¹⁰¹ Bona—bona haba Mu lati. Ne ba Mu hanile hape, ni katengo ka bona. Neba ka itakaleza, kacenu, sina mone ba ezelize ha Nali fa muliko. Mi kacenu, mi Linzwi ha lili fa muliko, ki sikamañi se si ezahalile? Ba hanile hape inge mone ba ezelize ka nako yani, mi ba amuhela Barabbasi, sibulai, mwa sibaka sa Kreste. Katengo kaka eza nto yeswana. Mi, kacenu, kakuli ba hanile Linzwi ni ponahazo ya hola yateni, ba lekisize ni ku i ketela Barabbasi, Katengo ka Likeleke za Lifasi, sibulai sa Linzwi. [Hakuna manzwi fa tepu—Mu.]

¹⁰² Ba latula Linzwi la Hae, kulatula kolobezo ya Hae, kulatula Mata a Hae, kulatula lisupo za Hae. Mi ni tuto ya tumelo kamba sizo hape, za kutina makola a fetuhezi kwa mulaho, ni lika kaufela, ba i pangela lituto za litumelo, ni zeñwi cwalo, balika kueza cwalo, ka misebezi yeminde. Neba si kaleelwa kwa Bupilo, ka kukala. Ne basina sa kulumela ka sona.

“Ya Ni ziba, u ziba Ni Ndate. Mi sina Ndate ha Ni lumile, nina Ni mi luma cwalo.” Yena Mulimu ya na lumile Jesu na zamaya ni Jesu. Mi yena Jesu ya mi luma ki yena ya zamaya ni mina. “Ya lumela ku Na, misebezi ye Ni eza muka ieza ni mina. Muye cwale mwa lifasi kaufela, mi mukutaze Evangelii kwa libupiwa kaufela,” ba bansu, baba ñanda talukeke, ba basweu, baba fubelu, kaufela sa kona kuba sona. “Lisupo ze lika latelela baba lumela.” Kuisa kai? “Lifasi kaufela, ni kwa sibupiwa kaufela.”

¹⁰³ Mukutazi yomunyinyani wa Baptist, haki kale hahulu mwa Tucson, ataha ku na, ali, “Muzwale Branham, ki bo butata bwa hao faa. Wena ulika kueza lusika lo kuba lwa ba apositola.” Mi ali, “Hakuna nto yecwalo kuli lusika lwa ba apositola kacenu. Lusika lwa ba apositola lu felile.”

¹⁰⁴ Se nili, “Ku cwalo? Ne ni sika li ziba.”

Mi ki hali, “Kihande, ku cwalo.”

Se nili, “Wa kolwa cwalo?”

Yena ali, “Luli. Na kolwa,” a bulela.

“Ku lukile,” Se nili, “u nahana cwani kuli ku felile?”

Ali, “Bani neli ba apositola.”

¹⁰⁵ Se nili, “Pitrosi naize, ka Lizazi la Pentekota. Kana mwa lumela Linzwi la hae?”

“Eeni, sha.”

¹⁰⁶ “Mi ali, ‘Mubake, mañi ni mañi wa mina, mi mu kolobezwe ka Libizo la Jesu Kreste. Kakuli sepiso ye i filwe mina, ni kwa bana ba mina, ni kwa bana ba bana ba mina, ni ku bao baba kwahule kaufela, mane ni bao Mulena Mulimu wa luna uka biza.’”

¹⁰⁷ Yona sepiso yeswana ye, lu lukela kukutela ku yona! Dokota Simoni Pitrosi na ñozi munwelo wa mulyani. Bibele iize, “Kana hakuna mulyani mwa Giliadi nji? Kikuli hakuna ñaka mwateni naa?”

Kihande, mwa ziba, haiba munga munwelo wa mulyani ku dokota. Ha fumani butuku bo bu mwa mubili wa mina, mi u ñola mo mu swanela kunwela munwelo wa mulyani woo; kihande mu ikutwele ona, hamuba ni mulekisi wa milyani yomuñwi yaka utwisisa mo u ñolezwi. Kakuli, una ni kubeya mwateni sifanu ka buñata luli, ni mulyani o lwanisa buhazo bwatene, kuli mane mubili wa mina ukone ku unwa. Mwa bona, una . . . U likilwe kale mi u tatubilwe, mi mulukela ku amuhela munwelo wa mulyani woo. Haiba hamu ezi cwalo, mu ikungela dokota yomunwi wa lihata kuli akeshebise sani, ya sa zibi mwa ku pimela mulyani wani hande, uka mi bulaya. Mi haiba uka upesula hahulu kufitelela tikanyo, hauna ku mi tusa ni hanyinyani.

¹⁰⁸ Mi bwani kona butata bo bana ni madokota babañata. Mu sweli ku keshebisa munwelo wa mulyani wani!

Pitrosi naize, “Ni ka mifa munwelo wa mulyani wa kuyakuile, wa mina, ni kwa bana ba mina, ni bao babali kwahule, mane babañata cwalo bao Mulena Mulimu wa luna uka biza.” Isiñi, “Mutahe mu ikopanye.” Kono, “Mubake, mañi ni mañi wa ku mina, mi mu kolobezwe ka Libizo la Jesu Kreste kwa swalelo ya libi, mi mu ka amuhela linepo,” amen, “ona Moya o Kenile. Kakuli sepiso, ona munwelo wa mulyani woo, ki wa mina, ni wa bana ba mina.”

Cwale, babañwi ba mina madokota ba mahata, mutuhele ku ñolanga milyani ya buhata yeo. Mwabona? Musweli ku bulaya batu ba mina. Uh-huh. Ki kabakaleo Nto ya niti haisa fiti ku bona. Eeni.

¹⁰⁹ Mwa ziba, fa munwelo wa mulyani o swana woo, ka mo dokota a fumanela milyani ya hae. Kamita ba ikungelanga yona ni . . . Ba sayansi balika ku nahana ni ku kopanya lika, kona baka lifa kwa kulube, ni kubona haiba li ka i bulaya kamba nee.

Mi cwale, mwa ziba, mulyani, una ni nako ya ku unwa. Mina, mwakona ku ikutwa hande, mi hakulata wakona ku mi bulaya, mwabona, kakuli batu kaufela haba swani sina likulube, mwendi.

Kacwalo, kono kuna ni nto iliñwi ka munwelo wa mulyani woo, ki wa batu kaufela.

¹¹⁰ Mi, cwale, dokota wa niti ufi kaufela ya sike ku... yana ni tumelo yeñata mwa milyani ya hae, hana ku buza mutu sika. Babañwi ba bona ki mapyeha bakena mwa tolongo ya bupilo, mi ni ku mu lukulula haiba apila ka ona, amu mu tuhele fela aikungele munwelo wa mulyani.

¹¹¹ Kono, mwa sibaka se, ne luna ni Dokota wa niti. A taha, anga munwelo wa mulyani, yena Kasibili. Mwabona? "KINA." Isiñi kuli, "Ni kaba." "Kina zuho ni Bupilo," kubulela Mulimu. "Ya lumela ku Na, ni ha shwile, uka pila hape. Mi ya pila kaufela mi a lumela ku Na hana kushwa." Mareta ali... Yena ali, "Kana u lumela cwalo?"

¹¹² Musali ali, "Niti, Mulena, Ni lumela kuli ki Wena Kreste yana swanezi kutaha mwa lifasi. Hakuna taba kamba babañwi ba Ku biza cwani, Na ni iponezi zona!"

¹¹³ Fa Kalvari, Na ngile kauhano, yena Kasibili. Mi ka la Zuhu kakusasana, lifu ne li si ka Mu swala. "Kina zuho ni Bupilo." Neba Mu tabile lifu, kono A zuha, fa kukoma lifu, lihele, ni libita. Na amuhezi ndonga, yena Kasibili.

Mi A luma madokota babañwi kuli bañoli munwelo wa mulyani, bona bene ba nani sinulo ya Seo Nali sona.

"Kanti batu bali ki Na mañi na nili Mwana mutu?"

¹¹⁴ Pitrosi ali, "Ki wena Kreste, Mwana Mulimu wa pila."

¹¹⁵ Ki hali, "U fuyozwi wena, Simoni. U lemuhile cwale. Ni kufa linotolo za Mubuso. Kaufela so ka tama mwa lifasi, Ni ka si tama mwa Lihalimu. Haiba u tamulula sika mwa lifasi, Ni ka si tamulula mwa Lihalimu."

¹¹⁶ Mi ka Lizazi la Pentekota, hane ba boni zeo kaufela ha li ezahala, ki hali... Bona bali, "Ki sikamañi se luka eza kuli lu amuhele mulwani woo?"

¹¹⁷ Fa lu bala munwelo wa mulyani. Ki hali, "Cwale Ni ka ñola munwelo wa mulyani. Ki ya mina, ni kwa bana ba mina, ni ku babali kwahule kaufela, mane ni babañata bao Mulena Mulimu wa luna aka biza."

Musike mwa keshebisa munwelo wa mulyani; muka shwa! Ba ieza kuba ye fokola hahulu, kacenu, kufitela liba nto isili kwanda kuba fela mezi a kopano, yeo ki niti, ki mulyani wa ku omisa o ba taba mutu ya shwile kuli abe ya shwelezi hahulu.

Oh, kono, muzwale, kuna ni tozo ya niti! Kuna ni mulyani mwa Giliadi. Ki foliso ya moyo. Fela musike mwa keshebisa munwelo wa mulyani. Munge munwelo wa mulyani ka mo u ñolezwi, mi Mulimu utamehile kwa Linzwi la Hae; isiñi kutameha mwa lituto za litumelo, kamba tuto ya litapelo, kamba kopano. U tamehile kwa Linzwi la Hae. Mu latelele munwelo wa mulyani, ao kona makalelo a pili. Ku kala, konakuli mu iñolisize mi muitukiselizse ku yo beleka.

Mulemuhe, “kwande a mafulo.”

¹¹⁸ Ba iketezi Barabbasi kacenu. Mi Evangel ha se i ile kwa mulaho ni kwa pata, mwahala lifasi, lisupo zetuna ni ze komokisa li lateleziancafazo, kono, kufita kutaha mwahali ni kulika kueza sika, ba tamahani hande ni Barabbasi. “Lusika ba kale ni bukuba bo, ni zeñwi cwalo, mwa keleke ya luna, lukaba baba ipitezi sina babañwi baba siyezi.” Cwale bana ni Rome ni bao kaufela hamoho, ki Barabbasi. Mulemuhe, lukeni cwale mwa mafulo ani.

¹¹⁹ Lwa memiwa kuya kwande a mafulo. “Jesu hape, kuli Akone ku kenisa sicaba ka Mali a Hae Kasibili, a nyandela kwande a munzi. Haluyeni ku Yena kwande a munzi,” mutualime, “lu lwale maswabi a Hae.”

¹²⁰ Ki sikamañi sa Na swabisezwa? Isiñi kuli Neli wa Methodist kamba wa Baptist, Ni ka mi bonisa niti ya seo; isiñi kuli Nali Mufarisi kamba Musaduki. Kakuli Nali Linzwi leli pakilwe.

¹²¹ “Kulwala maswabi a Hae,” ka (sikamañi?) kwa Linzwi leli pakilwe. Yeo ki niti. Sani kona sa Na ezize. Na ize, “Ha Ni sa ezi misebezi ya Ndate Luli, musike mwa Ni lumela; haiba ha ki Na kalabo kwa Mañolo kaufela.”

¹²² Jesu wa Testamente ye Nca neli Jehovah wa ya Kale. Luli ku cwalo! Na lumela, sina hane Ni mi bulelela kwanu cwale, nako nyana ye fitile, kamba kokuñwi mwa mukopano. Mwendi hakulata ha ki kwanu. “Jehova wa Testamente ya Kale ki yena Jesu wa ye Nca.” Mwa hupula za—za—za . . .

Hane Ni ya kwa kuzuma tumale kakusasana wani, mi ki kani fani, ona mitai yemituna yani yene felezi ku ulimuñwi kwani, ona fani fa lilundu; na inge ni yeni fani nali ku talimela fateni. Mi Na sutelela bukaufi ni ku tubula kuwanu yaka, na lula tobolo yaka fafasi, na fita teñi kwani. Mi Linzwi la nyanganyisa likota, lali, “Jesu wa Testamente ye Nca ki yena Jehovah wa ya Kale. Upile ya sephahala.” Kacwalo ona kwani kona kone ku bonahezi tumale kwani, mi, twa iponahaza hane kusina nihaiba kalikamu fani. Mwabona? Yeo ki Niti. Mwabona? Ki niti. Kacwalo, Mulimu wa ziba, fapila Yo Ni yemi fapila hae, ki Niti ya zona. Yeo ki niti. Ki Niti.

¹²³ Ona mwa Kentucky mo; mi kuna ni batu baba litemi ona mo busihu boo, neba liteni hane liezahala hape, ki nto ye swana. Eeni. Lu ziba kuli yeo ki Niti; Jesu wa Testamente ya Kale!

¹²⁴ Kuswana sina batu ba ma Chinese hane batile kwanu nako ya pili, neba sa zibi kubala kamba nihaiba kuñola mwa mushobo wa luna, kono nebali batu babatuna bene ba ziba ku tapisa libyana. Mi kacwalo neba . . . Ne muka ya kwa kutapisezwa libyana za mina kwa ma Chinese. Nana ni fela ze kenile, ni tusila totu sweu fateni. Na sa koni kubala nihaiba nto iliñwi, mi na ziba kuli ne musike mwakona kubala ni ha na ka ñola. Kacwalo, ha mu taha, na shimbanga fela kaemba kaka nyinyani ka kasweu ka

pampili, nto yeñwi yeswana sina *cwana*, kuli, ona fa, mi kipeto wa ka pazula mwa mukwa o muñwi sina *cwalo*. Cwale, wa mifa siemba silisiñwi sa pampili, mi yena ubuluka siemba se si siyezi sa pampili. Mi cwale ha mu yo kuta kuto nga sibyana sa mina, yena uli, “Halubone kaemba sa pampili ya hao.” Mi kipeto wa tu shimba; haiba ne tu lumelelana, kipeto ki sona sani. Muba ni libyana za mina ze ne tezi masila cwale se li kenile.

¹²⁵ Mi Jesu na swana sipolofita kaufela; mukwa kaufela wa Jehova wa Testamente ya Kale ki yena Jesu wa ye Nca. Na swana mwa lika kaufela.

Mutuhele ni bulele cwana ka sabo ya bumulimu ni likute, kono ka lilato, kono ni sepahale ka kuziba fo Ni yemi. Liñusa la hola ye la swana mwa lika kaufela ze ibulezi Bibele za hola ye. Cwale, haiba muna ni liapalo za masila, multise mwateni. Uh-huh. Kana mutapile mwa Mali a Ngunyana?

¹²⁶ Mulemuhe, “kulwala maswabi a Hae,” kakuli Nali yena Linzwi leli pakilwe. Sina nako yani, kona mo ku inezi ni cwale, Yena wa swana maabani, kacenu, ni kuyakuile. Maheberu 13:12 ni 13. Lu fumana mwa Maheberu . . . 8, 13:8, hape. “Ku lwala maswabi a Hae,” a Evangel.

¹²⁷ Ku lwala Libizo la Hae! A bulela kuli, “Na Ni tile ka Libizo la Ndate.” Ki lifi Libizo la Ndate? Yena Na tile ka Libizo la Ndate. Ali, “Na Ni tile ka Libizo la Ndate kono ha mu Ni amuheli.” Kihande? Ki lifi Libizo la Ndate? Ni sepa mulukela kuziba. Mwabona?

Ku lwala maswabi a Linzwi. Na lwaliwangwa kamita kwande a mafulo a bona. Ba Li kasheza kwande. U ka sehiwa, ni ku boniwa bukuba.

¹²⁸ Mi, kacenu, kone Ni kalezi kwa buse bwa nahaa . . . Ni sa ipuleli ka za ka; shangwe mu si nahani kuli zeo li ama na ka butu bwaka. Kono, nako yaka i felile, mi Nina ni mapampili a lishumi fa. Mwakona kubona ze siyezi fa, mwabona, mwabona, ku lukile, ze ñozwi. Kono, muteeleze. Pili ne ni kalezi kwa . . .

¹²⁹ Kana mu lemuhile Jesu ha Na kalile pili? “Oh, neli Muluti yomunyinyani. Oh, Nali Muuna yomunde! Taha kwanu ku luna. Taha uto lu kutaza.”

¹³⁰ Kono zazi leliñwi Aina ni bona, mi ki Hali, “Kwanda kuli muce nama ya Mwana mutu, ni kunwa Mali a Hae, hamuna Bupilo mwahala mina.”

¹³¹ Munahana kuli madokota ni baituti baba cilokile ba ngana neba nahanile sikamañi? “Muuna yo ki muca batu.” Mwabona? “Ubata kuli mu nwe mali a mutu. Zeo ki zetuna hahulu ku luna. Mu sabe ku Yena. Bona . . . baprisita bani bali Na pulumuka; Na lumela cwalo.” Mi Bibele ibulela kuli ba mu siya ku ikela.

¹³² Mi Nana ni bakutazi baba ketilwe baba mashumi a supile. Mi ki Hali, “Hanina kuba ni bona.”

Mi ki Ha talima mwahala bona, Mi ali, "Mu ka bulela cwani hamuka bona Mwana mutu ha kambamela kwa Lihalimu kwa Na zwile?" Cwale, Na si ka toloka lika zeo. Na ba tuhezi fela ona cwalo. Mwabona?

¹³³ Mi se bali, "Mwana mutu? Sikamañi? Lu ca ni Mutu. Lu yamba ni Yena. Lu ina fa likamba hamoho ni Yena. Lu boni sicelo kwa Na pepezwi. Lwa ziba Bo mahe. Lwa ba ziba mizwale ba Hae. Ki mañi ya kona ku amuhela nto ye Cwalo?"

Mi Bibebe ibulezi kuli, "Haba sika zamaya ni Yena ni kamuta."

¹³⁴ Mi A sikuluhela ku Pitrosi ni babañwi ba bona, ali, "Ni ketile ba lishumi ka bababeli, mina baba lishumi ka bababeli." Cwale, kuzwa mwahala likiti kiti, Uile kuba ba lishumi ka bababeli. Mi ali, "Ni ketile ba lishumi ka bababeli. Kanti, alimumu wa mina ki diabulosi. Na ziba cwalo, kuzwa kwa simuluho." Ki hali, "Cwale mubata kuya ni bona njii?"

Nasa tokwi ku kombelela ni ku omboaomba, za kuli, "Ni ka kueza kuba dikoni haiba uka to kopana kwa keleke ya ka." Mwabona? Hakuna licapu za kutula. Mane na si ka li toloka. Kamba nihaiiba kuli balutiwa ba li tatulule.

Kono, mwa hupula, Na ba bulelezi fela, "Ni mi zibile mane mutomo wa lifasi usika ba kale teñi. Ni mi ketile kuli mu amuhele tabo ni Na." Mwabona? Neku li cwalo, "ku sikaba kale mutomo wa lifasi," ku lemuhiwa kwapili.

¹³⁵ Ba apositola bani neba yemi fani ka buhali fela ona cwalo. Neba sa talusi mone ba ka cela nama ya Hae ni kunwa Mali a Hae. Neba sa utwisisi mwa Na tezi fa lifasi, kanti Nali ni bona mwa linako kaufela. Na si ka li talusa. Batu ne basika li utwisisa. Hakuna mutu yana lii tolokile.

Kono Pitrosi a bulela manzwi amande ani. Ki kabakaleo ha Na mu file linotolo zani. Ki ali, "Mulena, ki ku mañi ko lu kaya? Lwa ikolwisisa. Lu ziba kuli Wena, mi Wena fela unosi, ki wena ponahazo ya Linzwi la sepiso ya kacenu. Lu ziba kuli Wena unosi una ni Linzwi la Bupilo. Halukoni ku tatulula lika zani, kono lwa Li lumela, ni hakuli cwalo."

¹³⁶ Maretia yomunyinyani ali, "Kezela ka u shwile. U lobezi mwa libita. U bolile; wa nunka. Mulena, kambe No li kwanu, kezela ka kambe ha si ka shwa. Kono neba cwale, kaufela So ka kupa ku Mulimu, Mulimu uka Ku fa sona." Oh, mawi!

¹³⁷ Yena ali, "Kina zuho ni Bupilo. Ya lumela ku Na, ni ha shwile, niteni uka pila hape. Kaufela ya pila mi alumela ku Na, hana kushwa. Kana u lumela cwalo?"

¹³⁸ Musali ali, "Kaniti, Mulena. Hanikoni ku li talusa, kono Na lumela. Na lumela kuli ki Wena Kreste yana lukela kutaha mwa lifasi. Na lumela, ka Mañolo a zibahalile, kuli Wa swanelia mwa litiba Zeo."

¹³⁹ Ali, “Kikai komu mu bulukile?” Oh, mawi! Sesiñwi sina ni ku ezahala. Sika kaufela si taha hande hamoho ka nako ye swanela. Mwabona?

¹⁴⁰ Aya kwa libita. Bibebe iize, “Hakuna bunde bone bu ka lu lakazisa Yena.” Mwendi nali yomunyinyani, Mutangana wa maheta a nanuhezi mwa halimu, ayema ni maheta amanyinyani fafasi, a katezi mi a fufulelwa ka ku zamaya.

Mi ali, “Lazaro, zwa mo utahe!” Mi muuna yana shwile, mazazi amane, ayema ka mautu a hae.

¹⁴¹ Musala wa Sayansi ya Sikreste. Mu ni swalele haiba Ni holofaza maikuto a mina; Hani bati kueza cwalo. Musala wa Sayansi ya Sikreste, wa mwa keleke ona mo, na ni katani kwande zazi leliñwi. Mi ki hali, “Bo Branham,” musali ali, “Na lata mukutalezo wa mina, kono kuna ni nto iliñwi yo mu fiteleza hahulu ka yona!”

Se nili, “Ki nto ifi yeo?”

Ali, “Mu bulela hahulu za Jesu.”

¹⁴² Se nili, “Ni sepa kuli zeo kona fela Za ni lwaniseza.” Mwabona? Mwabona? Mwabona?

¹⁴³ Musali ali, “U Mu eza kuba Bumulimu.” Mwabona, haba lumeli kuli Na li wa Bumulimu. Ba lumela kuli Na li fela mutu sina babañwi, muluti yomunde, muituti wa za bulapeli. Ali, “U Mu eza kuba Bumulimu. Kanti Na si wa Bumulimu.”

¹⁴⁴ Se nili, “Oh, eeni, Nali cwalo.”

Musali ali, “Haiba Ni ku bonisa, ka Bibebe ya hao luli, kuli Ha ki wa Bumulimu, kana uka lumela nji?”

¹⁴⁵ Se nili, “Bibebe ya ka ibulela cwalo, Ni—Ni lumela Linzwi. Yani ki yena Yo ali Yena.”

Mi musali ali, “Ku Muñoli Joani, kauhanyo ya 11, fani Jesu ha naile kwa libita la Lazaro, Bibebe ibulela kuli Na lille.”

Se nili, “Sina ni sikamañi sa kueza ni seo?”

Musali ali, “Kihande, sani nesi bonisa kuli Ne si wa Bumulimu.”

¹⁴⁶ Na li, “Mu palelwa fela kubona kuli Mutu yani nali Mañi. Nali zepeli ali Mulimu ni mutu. Mi kakuba mutu, na lila, fani ha Na lila ka makeke a bona. Kono fani Ha yema ni kubulela kuli, ‘Lazaro, zwa mo utahe,’ mi muuna yana shwile, mazazi amane, ayema ka mautu hape, yani na fitelela mutu.” Eeni, sha! Eeni, kaniti!

¹⁴⁷ Mi Ni bile ni bulelanga cwana hañata, fani ha Na tuluka fa lilundu busihu bwani, na lapile, Nali mutu. Nana ni tala habusa kakusasana. Nali mutu. Kono ha Na ngile tunkwa to tubeli ni litapi ze ketalizoho, ni kufepa baba likiti ze ketalizoho, ba nopa lizuma ze supile, yani na fitelela mutu. Eeni, sha. Nali mutu, fa sifapahano, fani ha Na lila kuli, “Mulimu wa Ka, kiñi ha U Ni

tuhelezi?” Fani ha Na huwa kuli, “Amu Nife mezi,” mi ba Mu fa vinega ni nyoko, Nali mutu, a lila. Kono la Zuho kakusasana, fani ha Na lobile tamo kaufela ya lifu, lihele, ni libita, ni kuzuha, Nali ya fitelela mutu.

¹⁴⁸ Nali mutu ka busihu bwani, hana lobezi kwa mulaho wa sisepe kwa Na inzi kwani ni balutiwa, mi madimona aeza likiti ze mashumi a lela ku Mu tibisa. Uh-huh. Kwande kwani mwa sisepe nyana sa kale, inge kapendelo fela cwalo kwani, ona cwalo; Na katezi hahulu, na si ka Mu zusa mane. Nali mutu ha Na lobezi. Kono ha Na tilo hata liutu la Hae fa litusi la mukolo, mi atalima mwa halimu ni kubulela kuli, “Kozo, ibe teñi,” ki ha liñungwa ni mandinda li Mu utwa, yani neli ya fitelela mutu. Ne li Mulimu!

Ki kabakaleo muloki ha naize:

Kupila, Na ni latile; kushwa, Na ni pilisize;
Kupumbekwa, Na lwezi libi zaka;
Kuzuha, Na ni beile ya lukile kuyakuile;
Zazi leliñwi Uka taha, O ki lizazi la kanya!

¹⁴⁹ Eeni, sha! Muye kwande a mafulo. Hanina taba kamba butata bu kuma kai.

Ni ka lwala sifapahano se si kenile se
Kufitela lifu li ni lukulula;
Mi ni ye kwa Hae, ni yo tina mushukwe,
Kakuli kuna ni mushukwe wa ka.

¹⁵⁰ Ka kukwala, Ni ka bulela cwana. Ne ni bala likande nako yeñwi kwa mulaho, ka za muatuli. Nali muatuli ya lukile, muuna yomunde, na latiwa. Mi ne kuna ni sikuwata sa batu mwa tolopo bene ba hupula kuli neba ka eza ze ba bata kaufela, kacwalo, ne bana ni zeñata, kacwalo ba kwalula ndu ya libubo leli maswe, ili sintolo sa kulekisa zekola, zekola, lika kaufela ze swana sina cwalo. Ne ba sa lumelezi. Mi ba swalwa ki mulao, mutu wa milao ya kale, mi a tiswa kwa kuta. Mi cwale batu kaufela ba tolopo, tolopo ye nyinyani ya kopana, neba ziba kuli mutu yo na ezize lika zeñata mwa sibaka sani, yena muuna yana nani sibaka sa libubo le limaswe. Mi bona—bona, ba kuta, ba fumana muna yani ni mulatu, kakuli na swelwi kakata kusina mukwa. Mi kacwalo muatuli a mu fumana ni mulatu, ni ku mu atulela lilimo zeñata hahulu, kusina ku mu tamela kwande, kusina ku ikupela kamba sika kaufela, a mu luma, kakuli seo kona se ne u bulela mulao.

¹⁵¹ Sicaba kwande a kuta sa mu matisa, mi bali, “Kana mwa ziba? Mutu kaufela mwa tolopo ye uka ku toya!” Bali, “Ba ku toile ka kuba ni buiketelo bwani ka muuna yani.” Kaufela bona nebali balauli, bona kasibili. Mi bali, “Luna—kaufela luka ku toya. Haluna ku kuketa hape. Haluna kuba ni yomukana wa luna yaka ku botela,” ba mu swabisa inza ya mwa nzila cwalo.

¹⁵² Na yemi fela ka muzuzu, ali, “Tuhela ni be ni linzwi.” A li, “Ni ezize ka swanelo musebezi waka. Mutu yani nana ni mulatu,

hakuna taba kamba nali mañi. Mi Na mu atula kuya ka mulao o ne Ni itamile kuli Ni ka kuteka.”

Mi ali, “U toilwe mwa tolopo ye!”

¹⁵³ Mi ali, “Kono Ni latiwa hahulu kwa lapa, ki sicaba sa hesu.”

¹⁵⁴ Lwa kona ku nahana lika ze swana, haiba mukona ku swalela mubulelelo wo. Ni yemezi se Ni piliselizwe kueza, ili kuswala Linzwi la Mulimu le. Ni ziba kuli likopano li ni toile ka lika ze Ni bulelanga, kono Ni latiwa hahulu ki ba Ndu ya Hae, mwahala sicaba sa Hae.

Halu lapeleni.

¹⁵⁵ Mulena Jesu, lwa kona kutoiwa ki lifasi, kono lwa latiwa ki Ndate. Lu tuse, Mulimu yomunde. Tusa sicaba se, kuli mañi ni mañi wa bona, Mulena, kuli limbuyoti za Hao liine ku bona. Tuhela kuli luye kwande a mafulo cwale. Tuhela kuli luye kwande a minahano ya luna. Tuhela kuli lu zamaye ka minahano ya Mulimu. Mi Bibebe ibulezi kuli, “Mube ni munahano ono liteni ni ku Kreste.” Cwale tuhela kuli lu nahane minahano ya Hae, isiñi minahano ya luna fela, kakuli buñata bwa nako lwa fossa. Kacwalo, kuli lube ba niti, tuhela munahano wa Hae uine ku luna. Mi munahano wa Hae neli kueza tato ya Ndate, mi tato ya Ndate kona Linzwi la Hae la sepiso.

¹⁵⁶ Ha luyeni kwande a mafulo, busihu boo, Mulena, ni ku fumana Jesu. Haluna ku Mu fumana ka ku i kopanya kwa keleke. Haluna ku Mu fumana ka kuitumelisa mwa mazoho ni mukutazi yomuñwi, kamba—kamba kunyatela lituto za litumelo zeñwi, kamba nto isili ye lu sepisa, kuya kwa sikolo sa la Sunda ka mazazi a amañata hahulu mwa silimo, ni zeñwi cwalo. Luka Mu fumana fela mwa Linzwi, kakuli Yena ki Linzwi.

¹⁵⁷ Mi sina ha lubona lizazi leli sepisizwe le, kuli Ukaba kwande a mafulo, ku beiwa kwande hape; cwale ha luyeni kwande a mafulo, lu itukiseze ku lwala kuswaba kwa Hae; lu toiwe ki lifasi le, kono lwa latiwa ki Yena Ya lu memile kutaha kwa Mafulo. Lumeleza cwalo, Mulena.

¹⁵⁸ Haiba kuna ni baba sa Mu zibi, mi haba si ka zwela kale kwande a mafulo a tutengo totuñwi twa keleke, ibo mu ipapata kuba Mukreste. Kono ha mu kali, “Lika ze, Na lumela, kuli ki za lizazi lisili,” seo si bonisa kuli haikoni kuba Moya o Kenile.

Kana ku konahala cwani kuli mutu ya tezi Moya o Kenile a kolobezwé ka libizo la “Ndate, Mwana, Moya o Kenile”? Kanti, Paulusi, yena muapostola yomutuna, naize, “Haiba Lingeloi le lizwelela kwa Lihalimu...” Mwendi mukile mwa eza cwalo, nako yeñwi, mu sa zibi shutano ni yekana. Batu bani ne ba ezize cwalo, kusina kuziba shutano, mwa Likezo 19. Kono uize, “Haiba lingeloi lika kutaza sika kaufela se si shutani, libe anatema.”

Uka kona cwani ku amuhela lituto za litumelo, kamba za swaliso zeñwi, nto isili sili fela, kanti Bibele iize, “Sepiso i ku mina,” yona nto yeswana, “ki kolobezo ya niti ya Moya o Kenile”?

¹⁵⁹ Kana Moya o Kenile, ona ono ñozi Linzwi, ube ku mina, hape u hane Linzwi? Ukona cwani ku Li hana, kanti mane ona Moya o Kenile o swana ona Kasibili no ize, “Haiba mutu ufi kaufela uka ekeza linzwi lililiñwi ku Se, kamba kuzusa kwateni ku Lona, Nika zusa siemba sa hae mwa Buka ya Bupilo”? Cwale Moya o Kenile uka zusa cwani sika kwa Linzwi, kamba ku ekeza sika kwa Linzwi?

¹⁶⁰ Mulikana ka, sibeli sa mo hamoho cwalo ni sicaba se si sa bonahali ko ku kaya tepu, baba sa bonahali ku luna cwale, seo si nwele hande ka butungi mwa lipilu za mina kuzwa mwa Liñusa la kakusasana le fa tuto, ka kubona fo lu inzi. Haiba mwa li kuba munge mulyani wo ka munwelo o Ni ambozi ka ona nako nyana yefitile, kikuli hamuna ku li amuhela nji? Luteni mo kuli lueze lika kaufela ze lukona, kuli lu mituse.

¹⁶¹ Na ni paki fela. Na ni muketwa fela. Sina haluna ni zeo mwa Louisville cwale, ba—ba Mukopano wa za Tukuluho mwa Kentucky, ba... Basweli kuyaha katala kuli mutu wa bona ato ketelwa fateni. Nina hape ni yaha katala ka Mulena ka. Kikuli hamuna ku Mu amuhela, busihu bwa kacenu, kuba wa mina?

¹⁶² Ni litoho za luna ze inami, ni lipilu za luna, hape, mwa nako ye, mu nanule fela mazoho a mina ni kubulela ku Mulimu. Isiñi ku na; Na ni mutu fela. Amu nanule mazoho a mina ku Mulimu, muli, “Mulimu, uni utwele butuku. Ni bata ona lika ze kaufela ze Ni utwile. Ni bata kuya kwande a mafulo. Hanina taba ka sa bulela mutu.” Mulimu ami fuyole. Mawi, kwa mazoho, kwa mazoho! “Ni bata kuzwela kwande a mafulo. Hakuna taba kamba si ka ni tiseleza ze kuma kai, Nika shimba sifapahano sa ka ni ku si lwala zazi ni zazi. Ni ka zwela kwande a mafulo. Hakuna taba ka ze ba bulela batu ka na, Ni bata ku Mu latelela kwande a mafulo. Ni itukisize ku ya.”

¹⁶³ Ndata luna ya kwa Lihalimu, U boni mazoho ani. Mwendì ki batu baba mwanda, kamba kufitelela, mwa muyaho, baba nanuzi mazoho a bona. Mulena, kuna ni Sesiñwi bukaufi ni bona cwale, Mutu yomuñwi cwalo, yena Mutu wa Kreste, ya sa bonahali kwa liito la nama, mi u ba kondisize kuba ni buiketelo. Mwa bupilo bwa bona, ba ziba ha banze ba talimela mwa siiponi, ba bona kuli kuna ni se si tondahala. Mi ba bata kuli bupilo bwa bona kuli bube mwa sibupeho kuya ka sepiso ya Mulimu, mi ba nanuzi mazoho a bona ka busepahali bwa niti. Ba tuse, Mulena, kwa munyako omutuna busihu bwa kacenu, kwa mulaka wa lingu. Ha ba tahe mwateni cwalo ha munati ni ka buikokobezo. Lumeleza cwalo. Ki ba Hao, Mulena. U bonane ni bona.

¹⁶⁴ Cwale, ne basike ba eza bwani, ne basike ba nanula mazoho a bona, kusina sika sa moyo sesiñwi. Ku bonisa kuli kuna ni bupilo kokuñwi. Kakuli, kuya ka sayansi, mata a pupo na ka kutisa mazoho a luna mwatasi. Kono kubile nto isili ye keni mwa munahano wa bona, ye tisize kuli ba hanyeze mulao wa bukiti mi ba yemiseze mazoho a bona mwa halimu kulibana ni Mubupi ya ba bupile. “Eeni, Ni bata kuya musipili kaufela. Ni bata kuya kwande a mafulo, busihu bwa kacenu.”

¹⁶⁵ Mulena, siliba si lukile kwa muzamao wa pili kasamulaho wa kubaka, mi mumano kolobezwa, mi kutaha cwale sepiso ya ku amuhela Moya o Kenile. Mwa mazazi a maungulo a, ki pizo ya pili ya Tumelo, mutolokelo wa makalelo wa mulyani! Lu bona batu babañata ba keluha kuzwa ku Kreste, banze ba shwela mwatasasa litaelo za minwelo ya mulyani za ipangezi mutu. Bakona kuba babande kamita mwa likopano za bona, kono, Mulena, Ni—Ni bata mutolokelo wa Hao ka mo unwelwa mulyani.

Wena u Dokota wa luna. Kuna ni Dokota. Kuna ni mulyani mwa Giliadi. Kuna ni Ñaka mwahali mo, busihu bwa kacenu, kuli ato folisa moyo kaufela o kula sibi, ku to folisa mutu kaufela ka mibili. Dokota Yomutuna wa linako kaufela, Mubupi yomutuna wa lihalimu ni lifasi, taha cwale, a Kutahe, mwahala luna, mi ubulele ku luna. Ka Libizo la Jesu Kreste.

¹⁶⁶ Mi cwale mañi ni mañi hasweli kulapela mwa pilu ya hae, “Mulena Jesu, ni tuse cwale!” Mi haiba ha mu si ka kolobezwa kale, mi mwa ikolwisisa cwalo... Hani si ka kutaza fa kolobezo. Kono mwa ikolwisisa kuli mu lukela ku kolobezwa ka kolobezo ya Sikreste, yona nzila fela yeo Mukreste akona...

¹⁶⁷ Ku cwañi hane mu ka taha Fani, ka ku kolobezwa ka nzila yeñwi, mi Jesu ya swana ya Na bulezi kuli, “Yaka nga Linzwi lililiñwi, kamba ku ekeza linzwi lililiñwi, ze swana li ka zwiswa kwa siemba sa mwa Buka ya Bupilo”? Jesu na bulezi cwalo. Mi Ki ha sali, “Mañolo kaufela a susumelizwe mi alukela ku talelezwa.” Cwale mwa ziba ka ku shutana. Ki sikamañi se muka eza ka sona?

¹⁶⁸ Haiba muba fela ni maikuto kamba nto yeñwi! Ni lumela mwa maikuto. Haiba mu binezi fela mwa Moya, mubulezi ka malimi! Ni lumela mwa lika zeo, hape. Kono haiba zeo kona fela ze mu ziba, mi moyo wa mina ku mina u mi bulelela kuli musike mwa latelela Linzwi ha mu ziba kuli Ki niti, kuna ni se si fosahalile mwa moyo wani. Haki Moya o Kenile. Haku konahali kuba cwalo. Mwabona, Ne lika zibahaza Linzwi la Lona Kasibili. Mwa ziba cwalo. Mwakona ku itukiseza ku taha cwale halunze lu lapela.

¹⁶⁹ Jesu wa Nazareta, taha bukaufi cwale mi ubulele kwa pilu kaufela. Ni ba beya ku Wena. Ba ha babe... Ona mazoho kaufela ani, ki lifa za la Liñusa, Mulena, ze zwa ku Wena, mi cwale

Kubateni kwa Hao kokunde ko kutuna ku inzi ni luna. Mutu kaufela ya talifezi za Moya wakona kubulela kuli U teni fa, ona maikuto amatuna a lihalimu aa. Lumeleza cwalo, Mulena, ona fa cwana, ka Libizo la Jesu Kreste.

Cwale ni litoho za luna ze inami.

¹⁷⁰ Haiba kuna ni batu mo baba tabela ku kolobezwa ka Libizo la Jesu Kreste, baba bata ku baka, baba bata kukupa kolobezo ya Moya, kuna ni sibaka se si kwaluhile kwa neku la nzohoto ya ka; basali, ki kwa silyo. Ku kaba mutu mwani yaka mi bonisa. Kuna ni liapalo za ku kolobezwa ku zona ze libelezi, lika kaufela.

¹⁷¹ Cwale, halunze lu inamisize litoho ona cwalo, lu opele luli. “Ni utwa mu . . .” Luka ka kopana ni mina.



KUYA KWANDE A MAFULO LOZ64-0719E
(Going Beyond The Camp)

Liñusa le ka Muzwale William Marrion Branham ne li kutilizwe lwa pili mwa Sikuwa la Sunda manzibwana, Sikulu 19, 1964, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org